

CAÇA CHE DIRUN SAN PABLO MENAN, DECHUH YE YAHN IHYAN YAHN DENDIOHS CHE VATE YE YAN CORINTO

¹ U Pab^lo, che tendahnun Dendiohs u che co apóstol yahn Dihvo vo Jesucristo, nduco dihno vo Sóstenes,

² dirun nuhn çaça cuh, dechuh nuhn yahn nchuhn, ihyan yahn Dendiohs che ritahno ne Dihvo vo Jesucristo, vate ne yan Corinto. A tendahnun Dendiohs nchuhn che co ne ihyan ndah yahn ye, ritahno ne Dihvo vo Jesucristo. Numachahte iyehⁿse ne, a tendahnun ye uvo man, nducoyaca dihno vo man, che rendeva vo nduco ye yavenan Dihvo vo Jesucristo.

³ Chida vo Dendiohs man, Dihvo vo Jesucristo man, din yahino ye nchuhn, din ye che ndahca cuahtenan ne.

Yahino Dendiohs ihyan yahn ye che cuande yahn Dihvo vo Jesucristo

⁴ Cuahn dama renecáh nundihve cuahn Dendiohs çaça nchuhn yahn che yahino ye nchuhn che cuande yahn Dihvo vo Jesucristo.

⁵ Yahino ye nchuhn, ne te ndahva ye vederihquentiyon che cuahndudo ne ndudo yahn ye man, vededevano che chenan cuma ne man.

⁶ Tihca chinahn nduco ne, te a chitahno ne ndudo ndah yahn Dihvo vo Jesucristo.

⁷ Nchuhn nduco nducoyaca ihyan yahn Dendiohs, quendihconahn te ye vederihquentiyon yahn ye nchuhn. A chenan rino ne ro che ndaconan nda tun Dihvo vo Jesucristo.

⁸ Dendiohs ne, din ye che cochahino ne, quendi ne cotahno ne Dihvo vo Jesucristo, hua cuahtendihco ne nunde nde ro che ndaconan nda tun ye.

⁹ Dendiohs ne, redinahn ye ndudo yahn ye, ne man ye tendahnun ye nchuhn cava che cotahno ne Daya ye Jesucristo, ihyan min che Dihvo vo.

Ihyan che rendo dama ye yaco ne, o ino cuan ndi ye

¹⁰ Dihno, nducote renevahnecun nchuhn Dihvo vo Jesucristo ne, rahn ri nchuhn che ndo yan ne nduco vih, ama cuan co no ne man, ama no vederendedecadino cuahenen cuma ne man.

¹¹ Dihno, nahn che tihca din nchuhn, te rahn ihyan ndevaco cahvo vo Cloe ri ye u che vate canda ne nduco vih yahn che a vih rahn ama, a vih rahn tama ne.

¹² Nahn ne ne, rahn ne che riquendi ne ndudo che ricuahn Pablo, nahn ne ne, che ricuahn Apolos, nahn ne ne, che ricuahn Pedro, nahn ne ne, che chihuahn Dihvo vo Jesucristo.

¹³ Ama vedetundo che tihca redin ne. Dihvo vo Jesucristo ne, ama no ye. Ndiyu Pablo che quenah yah ye nan cruz cava che ndedevahn ye nchuhn. Ndiyu Pablo cah nchuhn cuahn che chedenune ne.

¹⁴ Nundihve cuahn Dendiohs che neve ra nchuhn, chehdenune nchuhn. Atenan Crispo man, Gayo man, chehdenune sahn.

¹⁵ Nde hua co cahma ne che u cah ne cuahn che chedenune ne.

¹⁶ Namin chehdenuné ihyan ndevaco Estéfanas. Co atenān ihyan chahn no che chehdenuné,

¹⁷ te dechuh Dihvo vo Jesucristo u, ndiyu che cuehdenuné ihyan, ate che cuahndudó ndudo ndah yahn ye. Rahndudó ndudo min numa cuaco. Hua retihdenān vededevano yahn mān, cava che tihca ne, codevano ndah ihyan nduhca che chih Dihvo vo Jesucristo, quenān yah ye nān cruz.

Ndudo yahn Dihvo vo Jesucristo ne, chemin che vederihquentiyon yahn Dendiohs mān, vededevano yahn ye mān

¹⁸ Ihyan che va che conda ye, din nunde yahn ye ne, rahco ye te ama vedetundo che ritahno vo che yahn che chih Dihvo vo Jesucristo, quenān yah ye nān cruz, co ndevahn vo. Ate uvo che ndedevahn Dendiohs uvo ne, a devano vo te chemin ne, ama vederihquentiyon chahte yahn ye,

¹⁹ nduhca che a ndirun nān Ndudo yahn ye tuhca:

Cahco ró che hua richihve vederendedecadino yahn ihyan,

decuihnó vededevano yahn ye.

²⁰ Anduhneca ndete che hua richihve ndudo yahn sahn devano mān, sahn che nda cuande se dehtenduh che ri iyehense cuh mān, te Dendiohs ne, a chihco ro ye che vededevano yahn se ne, ama vedetundo.

²¹ Tihca din ye, te numacuahn vededevano yahn ye chihco cade ye che ihyan iyehense ne, hua tuno vededevano yahn mān ye che cotahno ye ihyan. Tahque ndah ne, chihco cade ye che, nduco ndudo

yahn mañ ye che rahndudo vo, ndedevahn ye ihyan yahn ye, andahre rañco ihyan chenahn te chemin ne, ama vedetundo.

²² Ihyan nación yahn Israel ne, dinoca nahn ndi-
hchero ye vederihno ça va che cotahno ye. Ihyan
nación chenahn ne, atenañ vededevano che dama
nduco vededevano yahn mañ ye ritahno ye.

²³ Ate uvo, ihyan yahn Dendiohs ne, rahndudo
vo che, ça va che ndevahn ihyan ne, va che co-
tahno ye ndudo yahn Dihvo vo Jesucristo, ihyan
min che quenañ yah ye nañ cruz. Ihyan nación
yahn Israel ne, rahcotahn ye yahn ndudo min,
rahtendihco ye nunde. Ihyan nación chenahn ne,
rañco ye te ndudo min ne, ama vedetundo.

²⁴ Uvo che a tendahnun Dendiohs vañ ihyan
nación yahn Israel mañ, vañ ihyan nación
chenahn mañ ne, a devano vo che ndudo yahn
Dihvo vo Jesucristo ne, a vederihquentiyon yahn
Dendiohs mañ, vededevano yahn ye mañ.

²⁵ Vededevano yahn Dendiohs mañ, vederi-
hquentiyon yahn ye mañ ne, tahque chahte che
co nducuahn vededevano yahn ihyan iyehñse,
andahre rañco ye te ama vedetundo, nde hua
richihve.

²⁶ Dihno, cuenecañco ne nduhchan ihyan ne ro
menañ. Atenañ neve ne che ihyan devano ne vañ
combiero yahn ne mañ, neve ne che chenañ cuma
ne vederihquentiyon mañ, neve ne che ndađa
yahn ihyan nañ mañ,

²⁷ ate a tendahnun Dendiohs nchuhn. Ihyan
iyehñse ne, rañco ye che tundo ne mañ, che hua
rigonun chihve ne mañ, ate a tendahnun Den-
diohs nchuhn ça va che ndañco ndiya ye vedede-

vano yahn ihyan chahn mañ, vederihquentiyon yahn ye mañ.

²⁸ Yade ihyan chahn, ne rahco ye che ndere ihyan nchuhn, nde hua redin cuande ye nchuhn. Ate a tendahnun Dendiohs nchuhn, chihco ro ye che nde hua richihve vederendedecadino yahn ihyan chahn.

²⁹ Tihca din ye cava che nde ama ihyan, hua co din yade ye.

³⁰ A Dendiohs che din ye che ritahno vo Dihvo vo Jesucristo. A cava ihyan min che din ye che chenan cuma vo vededevano mañ, nchahco ye nunde yuhn vo mañ, nedin yahn ye uvo mañ, ndedevahn ye uvo mañ.

³¹ Che nahn ne, che dinahn ihyan nduhca che a ndirun nan Ndudo yahn Dendiohs tuhca: “Hua ndahca che ndeva mañ ihyan yavenan ye. Tahque ndah ne, ndeva ye yavenan Dihvo vo Dendiohs.”

2

Ndudo yahn che quenanyah Dihvo vo Jesucristo nan cruz

¹ Dihno, cuahn che nda cahndudo ndudo yahn Dendiohs, chihnevan ne ne, hua din yade, te cahndudo numacuahn vedenecon.

² Chihco cudado che cahndudo deman ndudo yahn che quenanyah Dihvo vo Jesucristo nan cruz, ndedevahn ye uvo.

³ Numacuahn ro che quenanyan vaco nchuhn ne, quechica numacuahn vedino vedenecon. Ama vahino mañ, ama ndedecadino mañ, yahn ntiyon cahnda che quenán.

⁴ Numacuahn vederihquentiyon yahn Vaco Ndah yahn Dendiohs, nté mañ, cahndudó mañ, vañ nchuhn. Nde tah hua chihchetáhn vededevano yahn mañ,

⁵ cava che a vederihquentiyon yahn Dendiohs din che cotahno ne, ndiyu vededevano yahn mañ.

Redin Vaco Ndah yahn Dendiohs che renahn vo vederihquentiyon yahn ye

⁶ Nuhn che rahndudo nuhn Ndudo yahn Dendiohs vañ nchuhn che a renahn ndah ne mañ, vañ ihyan chenahn mañ ne, hua rahndudo nuhn vededevano yahn mañ nuhn, te rahndudo nuhn demañ vededevano yahn Dendiohs. Vededevano min ne, yahn Dendiohs, ndiyu yahn ihyan iyehnse. Ndiyu yahn sahn devano mañ, sahn ndinan mañ, che vate se mañ ro cuh. Sahn chahn ne, va che cuihno se.

⁷ Tahque ndah ne, rahndudo nuhn vededevano yahn Dendiohs che cade te ye, checadino vo, che nde hua devano ihyan ro menañ. Nde cuahn che ametah dendah ye iyehnse ne, chihco cade ye vededevano min nduhca che ndedevahn ye uvo, cuahtenan vo vahchetero numacuahn ro.

⁸ Nde ama sahn che rihquentiyon se iyehnse cuh ne, hua tumacadino se yahn vededevano min. Chemin che nahn yah se Dihvo vo Jesucristo, ihyan min che ama yudo vederihquentiyon que nan cuma ye. Ndete che tumacadino se ne, hua tihca din se.

⁹ Andahre tihca din sahn chahn, ate a chinahn nduhca che ndirun nan Ndudo yahn Dendiohs tuhca:

Dendiohs ne, a chihco çade ye che conan cuma ye vedeyahino nduco ihyan che yahino ye.

¶ Ama chahte vedeyahino yahn ye, che nde hua co tumacadino ihyan nunde.

¹⁰ Ate uvo, ihyan yahn ye ne, din ye che quenun Vaco Ndah yahn ye uvo, tumacadino vo yahn vedeyahino yahn ye. Vaco Ndah yahn Dendiohs ne, devano ndah nducuahn che ri, nde nducuahn che redin ye.

¹¹ ¶an ihyan iyehnse ne, queri ama ye ne, atenan man ye devano ye che rendedecadino ye. Namin nde ama ihyan hua devano ye che rendedecadino Dendiohs. Atenan Vaco Ndah yahn ye devano.

¹² Nuhn che rahndudo nuhn Ndudo yahn Dendiohs ne, ndiyu vededevano yahn ihyan iyehnse che te Dendiohs, chenan cuma nuhn. Tahque ndah ne, din ye che quenun Vaco Ndah yahn ye nuhn, din che tumacadino nuhn yahn vedeyahino yahn ye çava nducoyaco vo.

¹³ Ndiyu nduco vededevano che chahn nuhn yahn ihyan, che rahndudo nuhn ndudo yahn vedeyahino yahn Dendiohs. Tahque ndah ne, a Vaco Ndah yahn ye che rete vededevano nuhn che rahndudo nuhn. Tihça rinan Vaco ye nuhn che rahndudo nuhn ndudo che nahn che cadino ihyan.

¹⁴ Ihyan iyehnse ne, hua renevahnecun ye ved-erihquentiyon yahn Vaco Ndah yahn Dendiohs, te rahco ye te chemin ne, ama vedetundo. Nde hua retumacadino ye yahn, te atenan ihyan che quenun Vaco Ndah yahn Dendiohs ihyan co tumacadino ye.

¹⁵ Ihyan che quenun Vaco Ndah yahn Dendiohs ihyan ne, retumacadino ye yahn nducuahn dehtenduh, ne nde ama ihyan hua ndahca che ndahchenan ye ihyan.

¹⁶ A ndirun nan Ndudo yahn Dendiohs tuhca: “Ametah nde ama ihyan iyehnse che co tumacadino ye yahn vederendedecadino yahn Dihvo vo Dendiohs. Ametah nde ama ye che tuno vededevano yahn ye che cacuahn ye ihyan.” Ate uvo che nedin yahn Dendiohs uvo ne, ama no vederendedecadino yuhn vo nduco Dihvo vo Jesucristo.

3

Ihyan che redin ye ntiyon yahn Dendiohs

¹ Dihno, cuahn che quenán nduco nchuhn ne, anduhneca ihyan che hua conun Vaco Ndah yahn Dendiohs ihyan man, anduhneca ihyan nunde man, anduhneca checahya che quemán rico man, tihchan ne, te metah conahn ndah ne ndudo yahn Dihvo vo Jesucristo. Chemin che hua chi chicuahn nchuhn nduhca che redin yahn che cacuahn ihyan che renahn ndah ye.

² Nduhca che redin ihyan nduco decuah yuno, ricuh ye deman leche yahn che hua ri che cahcacheh ye dehtenduh, tihca din nduco nchuhn ro min, te metah tumacadino ndah ne, ne hua chi chicuahn ndah nchuhn. A devano te nde meniyan ne, ametah tumacadino ndah ne,

³ te dama ri ne nduco ihyan nunde. Redin ve ne yahn vih man, vate canda ne nduco vih man, o ino cuan ndi ne man. Che tihca redin ne ne, rihco ro

ne che dama vederendedecadino yahn ne nduco ihyan nunde.

⁴ A ndero ndi che o ino cuan ndi ne, te nah̄n ne ne, rah̄n ne che riquendi ne che ricuahn Pab̄lo, nah̄n ne ne, rah̄n ne che riquendi ne che ricuahn Apolos. Vatechica ne nduhcā ihyan nunde.

⁵ U nduco Apolos, atenan̄ ntiyon yahn Dihvo vo Dendiohs redin nuhn. Ndā nuhn yan̄ vaco nchuhn, cahndudo nuhn ndudo yahn Dihvo vo Jesucristo, chitahno ne. Queri amā nuhn ne, redin nuhn nduhneva ntiyon che chihco ye tah̄ nuhn.

⁶ Nuhn ne, ihyan redin ntiyon yahn ye nuhn. U, ne anduhnecā ndete che tuhdó ndute ndata, te u menan̄ ndita cahndudó ndudo ndah̄ yahn Dihvo vo Jesucristo, chihnevan ne, ne Apolos ne, anduhnecā ndete che chi se nune van̄ chendata, te quendi ye chicuahn̄ ye nchuhn. Ate a Dendiohs che din ye che chitahno ne.

⁷ Ntiyon yahn nuhn ne, nduhcā ntiyon che redin ihyan viyata. Nah̄n cuan̄ ne, riquendāh̄ yahn amā ihyan che retuhdo ye ndute ndata, ne riquendāh̄ yahn tamā ye che ri ye nune van̄. Ate a Dendiohs che redin ye che rihta. Nducote tihcā ne, tumacadino vo che anduhnecā ndete che hua rignonun chihve ntiyon yahn amā tamā ye, che retuhdo ye ndute ndata man̄, che ri ye nune van̄ man̄, te atenan̄ Dendiohs che redin ye che rihta.

⁸ Ihyan che retuhdo ye ndute ndata man̄, ihyan che ri ye nune van̄ man̄, amā cuan̄ ndi no ntiyon yahn ye nduco vih. Tihcā ntiyon che redin nuhn nduco vih. Ate a devano vo te Dendiohs ne, ndah̄co menun̄ ye yahn queri amā vo tunoca ntiyon che a nedin vo.

⁹ Nuhn ne, dama redin nuhn ntiyon yahn Dendiohs nduco vih, ne nchuhn ne, anduhneca ndete che chendaṭa yahn ye.

Atihnoḅa co cahma vo che nchuhn ne, anduhneca ndete che ama vah che rihno Dendiohs.

¹⁰ Numacuahn vedeyahino yahn ye ne, ndaḅco ye ntiyon taḅ che có anduhneca sahn vihcherahto ndaḅ che chihcó name yahn ama vah, ne tama ye ne, riquendi ye rahto ye. Ate nahn che queri ama ye ne, caḅco ye cudaḅo nduhca che rahto ye.

¹¹ Name min ne, anduhneca ndudo yahn Dihvo vo Jesucristo che nde ama iḅyan, hua co ndaḅcorun ye.

¹² Ate anduhneca ndete che ama ndeh nan che co cuahto nduco ye. Anduhneca ndete che co cuahto ye nduco dehtenduh che cocha nduhca diyahnguan maḅ, diyahngua maḅ, tu diyahn maḅ. Namin anduhneca ndete che co dendah ye nduco dehtenduh che hua cocha nduhca irahno maḅ, nduco maḅ, yaṭa cuma maḅ.

¹³ Ate ntiyon yahn queri ama ye ne, va che co ro ndete che quendaḅ ndaḅ, te nda ro che techecaḅe Dendiohs ne, anduhneca ndete che ndihchenan ye nduco ruchiyahn.

¹⁴ Duh iḅyan che quendaḅ ndaḅ ntiyon yahn ye, anduhneca ndete che ndahto ye nduco dehtenduh che hua cuco ne, iḅyan min ne, ndaḅco menun Dendiohs yahn ye.

¹⁵ Duh iḅyan che hua quendaḅ ndaḅ ntiyon yahn ye ne, andahre ndevahn maḅ ye, anduhneca ama iḅyan che ndevahn ye vaḅ ruchiyahn ne, ate va che conda ntiyon che nedin ye.

¹⁶ A devano ne te nchuhn ne, anduhneca ndete

che ama yaco yahn Dendiohs nan che quenun Vaco Ndah yahn ye.

¹⁷ Duh ihyan che detoh ye ino ihyan yahn Dendiohs ne, din Dendiohs castigo ihyan, te ihyan yahn ye ne, a ndihco vih ye çava ye.

¹⁸ Nde ama nchuhn ne, hua cahncheh man ne nchuhn. Duh nchuhn che ama quenan cuma ne vededevano yahn ihyan iyehnse che rahco ne ne, cuihcoman ne vededevano min, cuiquendi ne vededevano yahn Dendiohs,

¹⁹ te vededevano yahn ihyan iyehnse ne, ama vedetundo nan Dendiohs nduhça che ndirun nan Ndudo yahn ye tuhça: “Rahnecun Dendiohs çhe rinda ihyan, redin vederendedecadino yahn man ye.”

²⁰ Namin a ndirun: “Nan Dihvo vo Dendiohs ne, nde hua richihve vederendedecadino yahn ihyan devano.”

²¹ Chemin che hua din yade nchuhn, tendahnun ne che ricuahn queri ama nuhn, quendi ne, te nducuahn vederihquentiyon yahn Dendiohs ne, a chihnde çava che ndah yahn ne.

²² A Dendiohs che dechuh ye Pablo man, Apolos man, Pedro man. A ihyan min che dendah ye iyehnse man, rete ye vedevihche yahn nchuhn man, rihquentiyon ye vederih man, ro cuh man, ro che cohi man. Nducuahn ne, a çava che ndah yahn ne che chihco çade ye.

²³ Avane ne, a yahn Dihvo vo Jesucristo nchuhn, ne ihyan min ne, a Daya Dendiohs ihyan.

4

Ntiyon che chenan cuma ihyan apostol

¹ Hua din yađe nchuhn çava nde ama nuhn. Cuedevano ne te queri ama nuhn ne, a ntiyon yahn Dihvo vo Jesucristo redin nuhn, rahndudo nuhn ndudo yahn vederihquentiyon yahn Dendiohs che cade te ye, checadino vo.

² Nducote tihça ne, nahn che queri ama ihyan che va taħ ye ntiyon yahn Dendiohs ne, dinahn ye ntiyon min numa cuąco.

³ Che lado yáhn ne, nde hua retumacáh, a nchuhn, o intiyahn, deh raħn ne yáhn nduhça che redín ntiyon yahn ye. Nde mán, hua co çahmá ndete che ndahça, o hua ndahça redín,

⁴ te andahre dave yavenán ne, ate nde mán hua devanó ndete che ndah redináhn. Atenan Dihvo vo Jesucristo, ihyan min che nda cuande ye ntiyon che redín.

⁵ Chemin che conan rino nchuhn, hua ndahchenan ne taħan redin ihyan ntiyon yahn Dendiohs nde nda ro yahn. Nda ro min ne, a Dihvo vo Jesucristo techecade ye yahn queri ama vo tunoca vederendedecadino yuhn vo cuahn che chahtenan vo iyehñse, çahco ro ye ndete che numa cuąco nedin vo ntiyon che chihnde taħ vo. Tuhme ndahco menun Dendiohs yuhn vo tunoca ntiyon che nedin vo.

⁶ Dihnó, a çava che ndah yahn ne che tihça riyahvé nchuhn. Andahre ndudo che ricuahn ihyan chenahn che redin che o ino cuan ndi nchuhn nduco vih, ate a dirún yahn ne anduhñeça ndete che u nduco Apolos chendihco nuhn nunde nan ndudo yahn nuhn. Tihça dirún yahn ne çava che tumacadino ne che vederihquentiyon che chenana cuma nuhn ne, hua tahque chahte che

co che a ndirun yahn n̄an Ndudo yahn Dendiohs. Namin çava che hua din yađe ne çava ntiyon yahn ama, ndahchenan ne ntiyon yahn tama.

⁷ Nde ama ihyan hua rendihche ye nchuhn che tahque ndah ihyan ne che co ihyan chenahn. A Dendiohs che te ye nducuahne che va yahn ne. Nducote a ihyan min che te ye ne, hua redin yahn che din yađe ne nduhça ndete che n̄an vedevano yahn mañ ne rendaça ne dehtenduh che va yahn ne.

⁸ A ama chenan cuma ne vederihquentiyon yahn Dendiohs, che rahco ne, a va tah ne ndendi ndendita, che rahco ne. Chacondah vedame ne nuhn, ne vate ne, rihquentiyon ne, che rahco ne. jAma ndahça ndete che cuaco niyon che rihquentiyon ne!, çava che nde nuhn ne, ndo dama nuhn nduco ne, cahcantiyon vo nduco vih.

⁹ Ama ndahça ndete che cuaco, te nuhn ihyan apóstol ne, hua tihça vate nuhn. Tahque ndah ne, cane rahcó che rahnecun Dendiohs che rechuhrihn nuhn nduhça ihyan che nde hua rigonun chihve ye mañ, nduhça ihyan che ndindah çaça nunde yahn ye çava che coh ye mañ. Cane rahcó che ndihco mendahn Dendiohs nuhn n̄an nducoyaça ihyan iyehnse mañ, n̄an ángel mañ, çava che çahn ino ye ndihchero ye nuhn.

¹⁰ Ihyan nunde ne, rendihchero ye nuhn nduhça ihyan tundo che rahndudo nuhn ndudo yahn Dihvo vo Jesucristo. Me nchuhn ne, ama devano ne ndudo yahn Dihvo vo Jesucristo, che rahco ne. Nuhn ne, ndi nuhn nduhça ihyan che nde hua rigonun chihve ye. Me nchuhn ne, ama

ndinan ne, che rahco ne. Nuhn ne, nde hua retumacah ihyan nuhn. Me nchuhn ne, ama rendeva ihyan yavenan ne.

¹¹ Nde meniyan ne, ama redin tan ihyan nduco nuhn. Ama rechuhrihn nuhn, rih cuico nuhn man, rih yaca nuhn man, metah tino yahn nuhn man, metah vaco nuhn man.

¹² A ndi cuno nuhn che redin man nuhn tama nan ntiyon cava che rendaca che rechuhnun nuhn. Rahva ihyan nduco nuhn, ate numacuahn vedenecon rendahconan nuhn yahn ye. Chenan nan ye nuhn, redin tan ye nduco nuhn, ate hua rihcoman nuhn ntiyon che chenan cuma nuhn.

¹³ Rendahchenan ye nuhn, ate riyahve nuhn ihyan nduco ndah. Cuahn dama rendihche ye nuhn nduhca dehtenduh che tahque chihnga.

¹⁴ Tihca dirun yahn nchuhn, ndiyu cava che cahtera vedecuihno yahn ne, ate cava che riyahve nchuhn nduhca daya che yahino.

¹⁵ Tihca dirun, te andahre ndiche mil ihyan che ricuahn ye nchuhn ndudo yahn Dihvo vo Jesucristo, ate hua yahino ye nchuhn nduhca che yahino nchuhn. U ne, anduhneca indihche yahn ne, te a u che tihyon yune nchuhn che chitahno ne Dihvo vo Jesucristo.

¹⁶ Chemin che, numacuahn chedave yahn, riyahve nchuhn che quendi ne yune yahn.

¹⁷ Cava che co dinahn nchuhn ne, dechuh Timoteo che conan se nchuhn. Ama yahino sahn. Anduhneca daya man, te u tihyon yune sahn che chitahno se Dihvo vo Jesucristo. Nde meniyan riquendi se, ndah redin se ntiyon yahn ye. Sahn min ne, nduhca che recah cuande man dihno

vo nduh cuan yaco nan che quechicá, tihca te cuande se nchuhn cava che necahco ne nduhca che ritahnó Dihvo vo Jesucristo, redinahn ndudo yahn ye.

¹⁸ Ama o nchuhn ne, ama redin yade ne, rahco ne che ametah ndaconan chí quendihcheró nchuhn.

¹⁹ Ate ndete che nahn Dihvo vo Jesucristo ne, chí nún quendihcheró nchuhn. Tuhme ndihcheró ndete che cuaco che rahn ihyan yade chahn che vatechica ye numa cuaco, chenán cuma ye vederihquentiyon yahn Dihvo vo Jesucristo.

²⁰ Tihca nahn che dín, te ndiyu ndudo che rahn ihyan rihco ro che rihquentiyon Dendiohs ihyan, te nan ntiyon che redin ye ne, min ndero ndi ndete che cuaco che chenán cuma ye vederihquentiyon.

²¹ Man ne, cuetendahnun nchuhn cha che ri yeno ne. ¿A nahn ne che chí numacuahn vedeyahino man, vedenecun man, conán nchuhn? ¿O nahn ne che chí numacuahn vedetan, dín castigo nchuhn?

5

Techecade Pablo ama nunde chihnga

¹ Numachahte va ndudo che ama se van nchuhn ne, quenán se nduco checuma se. Nunde min ne, ama chihnga. Nde van ihyan che hua devano ye che va Dendiohs ne, hua tihca redin ye.

² Ate nde nduco nduh ne, ama redin yade nchuhn. Tahque ndah ne ne, cuahte ran ne. Sahn chemin ca me ne, ametah cuahnecun nchuhn che conduco ca se van ne.

³ Andahre hua quenán nduco nchuhn tañ ne, yah ri chedave yáhn çava ne. A techecađé yahn se anduhneça ndete che quenún vañ nchuhn.

⁴ Ro che ndo ðama nchuhn, ndeva ne yavenañ Dihvo vo Jesucristo ne, anduhneça ndete che nducó nchuhn. Ro min ne, numacuahn vederihquentiyon yahn ye ne,

⁵ conðahco ne sahn tañ chundah çava che co se castigo, andahre ndevahn se ro che nda Dihvo vo.

⁶ Hua ndahça che rahnecun ne che rinduco ca se vañ ne. A ðevano ne te nduco tah sihn ya ne, ri ya numacuahn yache. Tihça redin nunde yahn sahn min, te redetohnan vederihquentiyon che chen an cuma nducoyaça ne.

⁷ Nduhça che rihtera ihyan ya ndico, redendah ye pañ che hua nduco ya yahn ne, tihça cuihcomañ nchuhn nunde che chen an cuma ne ro menañ, cuihco ro ne che a ndi vih ne çava Dendiohs. Tihça din ne, te nduhça ama itecuche lihn che chih te, chi te vedino ro yudo ne, tihça chih Dihvo vo Jesucristo, ndedevahn ye uvo.

⁸ Nduhça che rihcomañ ihyan pañ che ndindah nduco ya yahn ne, tihça nahn che çahcomañ vo nducuahn nunde yuhn vo, ne runecađe cuahtechico vo mañ, runecađe ndedecadino vo mañ, nduhça che nahn Dendiohs.

⁹ Nan çaca che dechúh yahn ne menañ ne, a dirún che hua conduco ne ihyan nunde che rahtenan ye nduco ihyan che hua nihnevaço nduco ye.

¹⁰ Ate hua dirún che ama yune no çahcomañ ne nducoyaça ihyan chahn mañ, combiero yahn ye che idihya ye mañ, che reduco ye mañ, che rendeva ye yavenañ dehtenduh che ndere redin

ye dendiohs yahn ye mañ, te cāva che metah ndihchero ne ihyan chahn ne, atenañ che ndāca ne iyehñse cuh.

¹¹ Che tihcā dirún ne, che hua conduco ne dihno vo ndete che rahtenan ye nduco ihyan che hua nihnevaco nduco ye mañ, ndete che idihya ye mañ, ndete che rendeva ye yavenañ dehtenduh che ndere redin ye dendiohs yahn ye mañ, ndete che rāhva ye mañ, ndete che ricoh ye mañ, ndete che reduco ye mañ. Nduco dihno vo che tihchan ye ne, nde hua cheh ne dāma nduco ye.

¹²⁻¹³ U ne, hua cuande yāhn che techecāde yahn ihyan che hua ritahno ye Dihvo vo Jesucristo. A mañ Dendiohs techecāde ye yahn ye. Me nchuhn ne, a dihno vo che rinduco ye nchuhn, va che techecāde ne yahn ye. Chemin che ametah cuah-necun ne che conduco ca sāhn nunde me nchuhn.

6

Hua ndahcā che cāhn dihno vo, cuhnde cāde yahn ye nduco vih nañ intiyahn yañ

¹ Cuahn che va cānda yahn nchuhn nduco vih ne, ndotenan che cāhn ne yāco, cuhnde cāde yahn ne ne, rahn ne nañ intiyahn yañ che nde hua ritahno ye Dihvo vo Jesucristo. ¿Tācā che ama tundo ne?

² Redin nchuhn anduhnecā ndete che hua devano ne te ndā ro yahn ne, nduco nchuhn ihyan yahn Dendiohs, techecāde ne yahn ihyan nunde. Nducote tihcā va cāde ne, tahque nun co techecāde ne cānda yahn ne che nde hua vāhche.

³ Redin ne anduhnecā ndete che hua devano ne che nde ángel va che techecāde ne yahn ye.

Tahque nun techecade ne yahn dehtenduh che rahno ri ne man ro cuh.

⁴ Tuhme ne, cuahn che va che cuhnde cade yahn ne nduco vih ne, ndotenan che cahne ne nan intiyahn yan che nde hua ritahno ye Dihvo vo Jesucristo ne, cahne ne nan dihno vo, andahre tundo ye, ne techecade ye yahn ne.

⁵ Tihca dirun yahn ne cava che co cuihnan ne. ¿Ametah nde ama ihyan van nchuhn che renahn ye mare tah, che co techecade ye yahn ne nduco vih?

⁶ Rihtera ne vedecuihno yahn ne che rahn ne, rica nunde ne yahn vih nan intiyahn che nde hua ritahno ye Dihvo vo.

⁷ Che rahte canda ne nduco vih ne, nduco chemin no, ama yahn redenda ne. Tahque ndah che codin chahtino ama tama ne yahn vih, nchahco ne nunde yahn vih.

⁸ Ate hua tihca redin ne, te tahque ndah ne ne, duche rino ne nde van man ne nduco vih, rahtendihco ne nunde.

⁹⁻¹⁰ A devano ne te ihyan nunde ne, hua cuah-tenan ye vahchetero nan che rihquentiyon Dendiohs. Cuedevano ne te ihyan che rahtenan ye nduco ihyan che hua nihnevaco nduco ye man, ihyan che redin duche yahn ye che a nihnevaco ye man, ihyan che hua numa cuaco ye, che mahndahtha mahndah chahn ye, che rahtenan ye van man nduco vih man, ihyan che rendeva ye yavenan dehtenduh che ndere redin ye dendiohs yahn ye man, ihyan che reduco ye man, ihyan che idihya ye man, ihyan che ricoh ye man, ihyan che rahva ye man ne, nde ama ihyan che tihchan ye ne, hua conan ye vahchetero.

11 Nahn nchuhn ne, tihchan ne ro menan. Ate man ne, numacuahn vederihquentiyon yahn Vaco Ndah yahn Dendiohs ne, a nchahco ye nunde yahn ne che cuande yahn Dihvo vo Jesucristo. A chedenune ne man, a nedin yahn ye nchuhn man.

Nahn che hua cuahtendihco vo nunde

12 Va ama ndudo che tuhca: “A dehno che nahn vo ne, co din vo.” Cuaco ndudo min, ate hua redin yahn che tihca din vo. Hua ndahca che quendi vo nunde yuhn vo.

13 Va tama ndudo che tuhca: “Dehtenduh che va ne, chihnde cava che chuh vo.” Cuaco ndudo min, ate nda ro yahn ne, ndahco cade Dendiohs nducuahn, nde metah rendotenan che chuh vo cava che cuahtenun ico vo. Dendah Dendiohs uvo, ate ndiyu cava che cuahtenan vo nduco ihyan che hua nihnevaco nduco vo, te dendah ye uvo cava che co yahn ye uvo.

14 Numacuahn vederihquentiyon ndedetuhche Dendiohs Dihvo vo Jesucristo, ne namin tihca ndedetuhche ye uvo.

15 A devano nchuhn te queri ama vo ne, a yahn Dihvo vo Jesucristo uvo. Nducote a yahn ye uvo ne, hua ndahca che cuahtenan vo nduco tahn che ndere vatechica te.

16 A devano ne te ihyan che conan ye nduco ndahta che ndere vatechica te ne, co ye nduco te anduhneca ama no ihyan nduhca che a ndirun nan Ndudo yahn Dendiohs tuhca: “Ihyan che conan cuma ye ama ndahta ne, co ye nduco te anduhneca ama no ihyan.”

17 Me ihyan che ritahno ye Dihvo vo Jesucristo ne, ndo ye nduco vih anduhneca ama no ihyan,

chenan cuma ye nduco vih vederihquentiyon yahn Vaco Ndah yahn Dendiohs.

¹⁸ Nducote tihca ne, condi nchuhn cuahtenan ne nduco ndahta che ndere vatechica te. Adecodehno nunde yahn ihyan ne, rahtendihco ye. Ate che rahtenan ye nduco ihyan che hua nihnevaco nduco ye ne, rahtendihco ye nunde, nde redetoh man ye ihyan.

¹⁹ A devano vo te a din Dendiohs che quenun Vaco Ndah yahn ye uvo, a ndi vih vo anduhneca ama yaco nan che quenun. Hua rihquentiyon man vo uvo,

²⁰ te a yahn Dendiohs uvo. Nde hua tuno vederendedecadino yuhn vo nduhva che yahino ye uvo, ndedevahn ye uvo cava man ye. Chemin che nahn che hua detoh man vo uvo man, ndeva vo numacuahn chedave yuhn vo yavenan ye man.

7

Cah cuande Pablo nduhca che cuahtenan cuma ihyan ndahta yahn ye

¹ Man ne, ndahconan yahn ne che dirun ne yahn. Rahco te ndahca cava ihyan che cuahteman ye.

² Ate cava che hua cuahtendihco ye nunde, ndere cuahtechica ye nduco vih ne, tahque ndah che cahnevaco ye.

³ Nchuhn che a nihnevaco ne ne, cuahtenan cuma ne vih nduhca che redin yahn cava che hua ndaca yune che ndere cuahtechica ama tama ne.

⁴ Nchuhn, ihyan ndahta ne, yahn ne inchahn ne. Nchuhn, ihyan chahn ne, yahn ne ihyan ndahta yahn ne. Chemin che nahn che dinahn ama tama ne yahn vih.

⁵ Hua cuahcotahn ne yahn vih, atenan che nte cade ne che hua cuahtenan ne nduco vih ama o ro cava che covah ne. Cuihno min ne, ndo dama ne nduco vih, te adenan hua cocha ama cha ne che rahn cuhndeman ne, ne conan ne nduco tama ihyan, condihco ne nunde, dinahn ne che nahn chundah.

⁶ Rahn ri nchuhn che recah yune Dendiohs che cahnevaco ihyan che nahn ye. Ate ihyan che cocha ye, cuahteman ye ne, co cuahteman ye.

⁷ Che lado yahn ne, ndahca che cuahteman ihyan nduhca u. Ate hua nducoyaca ye cocha ye. Dendiohs ne, hua dama vederihquentiyon necah ye chen an cuma queri ama ihyan.

⁸ Nchuhn, sahn decahya man, ndahta vah man ne, rahco te ama ndahca ndete che cuahteman ne nduhca u.

⁹ Ate ndete che hua chen an cuma ne vederihquentiyon che cocha ne cuahteman ne ne, tahque ndah che cahnevaco ne, yodemica che chuhrihn ne, ndedecadino ne che nahn cahnevaco ne.

¹⁰ Me nchuhn che nihnevaco ne ne, rete cuandé nchuhn vederihquentiyon yahn Dihvo vo Jesucristo che hua tehche vih ne.

¹¹ Ihyan ndahta ne, hua co tehche ye inchahn ye. Ndete che denan tehche ye inchahn ye ne, atenan che cuhndeman ye, o ndo nduco ye inchahn ye. Hua co cahnevaco ye nduco tama ca ihyan. Namin ihyan chahn ne, hua co tehche ye ndahta yahn ye.

¹² Man ne, te cuandé tama vederihquentiyon che hua ntihyon yan Dihvo vo Jesucristo. Dihno vo che nihnevaco ye nduco ndahta che hua ritahno te Dihvo vo Jesucristo ne, ndiyu cava chemin che

tehche ye tahn ndete che va te vedeyeno che quendi te nduco ye.

¹³ Namin cahvo vo che nihnevaco ye nduco chahn che hua ritahno se ne, ndiyu cava chemin che tehche ye sahn ndete che va se vedeyeno che quendi se nduco ye.

¹⁴ Ihyan chahn che hua ritahno ye ne, redin chahtino Dendiohs yahn ye che cuande yahn ihyan ndahta yahn ye che ritahno ye. Ihyan ndahta che hua ritahno ye ne, redin chahtino Dendiohs yahn ye che cuande yahn inchahn ye che ritahno ye. Ndete che hua tihca ne, daya ihyan chahn ne, anduhneca daya ihyan che hua ritahno ye. Ate redin chahtino Dendiohs, rendihche ye daya ihyan chahn anduhneca daya ihyan che ritahno nduh che o ye.

¹⁵ Ndete che ama cha ihyan che hua ritahno ye, nahn tehche ye ihyan che nihnevaco nduco ye che ritahno ye ne, a tehche no man ye vih, nde hua cahnda yahn ihyan che ritahno ye, te Dendiohs ne, hua nahn ye che cuahte canda ihyan chahn nduco vih.

¹⁶ Ndete che tihca nahn ihyan che hua ritahno ye ne, hua redin yahn che cuahcotahn ihyan che ritahno ye, te nchuhn ihyan ndahta ne, nde hua devano ne, ndete che cava ne cotahno inchahn ne, ndevahn ye. Namin nchuhn ihyan chahn ne, nde hua devano ne ndete cava ne cotahno ihyan ndahta yahn ne, ndevahn ye.

¹⁷ Andahre hua cocha ndudo yahn nchuhn che cotahno ye, ate va che cuahtenan ne vedeyeno nduhca che ndihco cade Dihvo vo Dendiohs yahn ne man, nduhca che chenan ne ro che ndedevahn

ye nchuhn mañ. Tihça rihquentiyón nduh cuañ yaco.

¹⁸ Nchuhn che chenan seña nchuhn ro min ne, hua dehve rahco ne, quendi ne. Me nchuhn che hua chenan seña nchuhn ro min ne, hua cuahne-cun ne che conan seña nchuhn.

¹⁹ A chenan, o hua chenan seña uvo ne, hua dehve din yahn chemin, te che nahn ne, che dinahn vo che rihquentiyon Dendiohs.

²⁰ Atanochan uvo ro che ndedevahn ye uvo ne, cuahtenan vo vedeyeno, quendi vo tihça.

²¹ Nchuhn che chenan cuma ne dihve ne, chenan ne vaco ye ro min ne, hua dehve rahco ne, quendi ne, din ne ntiyon yahn ye. Ndete che adenan te yune ye che ndaca ne ne, condaca ne.

²² Cuahn che chitahno ne Dihvo vo Jesucristo ne, nde ro min ne, a ndedevahn ye nchuhn cava mañ ye. Me nchuhn che rihquentiyon ne nan ntiyon yahn mañ ne ro che chitahno ne Dihvo vo ne, a ndo ne anduhneca ihyan redin ntiyon yahn ye.

²³ Ama chahte vedeyahino quenan cuma Dendiohs cava nchuhn, ndedevahn ye nchuhn. Cava nchuhn ne, tahque rignonun chihve vederihquentiyon yahn ye che co vederihquentiyon yahn ihyan.

²⁴ Dihno, nducote tihça ne, quendi nchuhn cuahtenan ne nan Dendiohs nduhça che chenan ne ro che ndedevahn ye nchuhn.

²⁵ Me nchuhn ihyan deçahya ne, hua te Dihvo vo Jesucristo, checadinó nde ama vederihquentiyon cava ne. Ate u ne, numacuahñ vedeyahino ndedevahn Dihvo vo u, ne redín ntiyon yahn ye numa cuaco. Chemin che rahco te cochihve che

te cuandé nchuhn taça cuahtenan ne.

26 Che lado yáhn ne, ndahça che cuahteman nchuhn, hua cahnevaco ne, te ro cuh che vato vo ne, cahnda.

27 Nchuhn che a nihnevaco ne ne, hua tehche ne ndahta yahn ne. Me nchuhn che metah cahnevaco ne ne, hua nuhn ne ndahta.

28 Nchuhn, sahn deçahya che cahnevaco ne ne, hua dehve rahco ne, hua nunde chemin. Me nchuhn, tañ deçahya che cahnevaco ne ne, hua nunde chemin. Ate adecoduhno nchuhn che cahnevaco ne ne, açadeno che yah cuahno ne. Rahn rí nchuhn çava che ndah yahn ne che tahque ndahça yahn ne che hua cahnevaco ne.

29 Dihno, rahn rí nchuhn te caviyan deman ne, conahn che ndihco çade Dendiohs. Man ne, nchuhn che nihnevaco ne ne, hua deman çava ndahta yahn ne ndedecadino ne. Menan viha condecadino ne nan ntiyon yahn Dendiohs.

30 Nchuhn che ran ne ne, hua deman vederan cuahte ne. Nchuhn che yeno ne ne, hua deman vedeyeno cuahte ne. Nchuhn che ra ne dehtenduh ne, hua çahco ne vedechahtino yahn ne nan dehtenduh chemin chan. Codin ne cuande anduhneça ndete che metah dehva yahn ne.

31 Nchuhn che ndah rahno ne, chenan ne iyehse ne, nde hua co yeno ne çava chemin, te nducuahn che va iyehse cuh ne, a nihnde çade yahn che va che cuihno.

32 Nahn che hua denduh ino nchuhn. Sahn che metah cahnevaco se ne, va man ino se, redin se ntiyon yahn Dihvo vo Jesucristo, nahn se che co yeno ye.

³³ Ate sahn che quenan cuma se ndahta yahn se ne, rendedecadino se yahn vederetahn yahn se, nahn se che co yeno ndahta yahn se.

³⁴ Atihnoça rahno ri tahn ndahta. Tahn che hua quenan cuma te inçahn te ne, va man ino te, redin te ntiyon yahn Dihvo vo Jesucristo numa ino te, ndi vih te çava Dendiohs. Ate tahn che quenan cuma te inçahn te ne, rendedecadino te yahn ntiyon yahn te vaço te, nahn te che co yeno inçahn te.

³⁵ Tihça dirún yahn nchuhn çava che ndah yahn ne, ndiyu che rihça tán che cahnevaco ne. Nahn che runecade cuahtenan ne iyehne, va man ino ne, din ne ntiyon yahn Dihvo vo Jesucristo.

³⁶ Che lado yahn ne, rahco che tahque ndah che cuahteman ihyan deçahya. Ate nchuhn che vate tahn çahya yahn ne ne, ndete che rahco ne che tahque ndah che cahnevaco nun te che co che cuahtenan te, co ndico te ne, co decahnevaco ne tahn, hua nunde chemin.

³⁷ Me nchuhn che a ndedecadino ne, a chihco ne chedave yahn ne che tahque ndah che hua decahnevaco ne tahn daya ne ne, hua dehve rahco ne, te namin ndahça che tihça din ne.

³⁸ Nducote tihça ne, ihyan che redcahnevaco ye daya ye ne, ndahça redin ye, ne ihyan che hua redcahnevaco ye daya ye ne, nde tahque ndahça redin ye.

³⁹ Ihyan ndahta che nihnevaco ye ne, a ndihco çade Dendiohs che hua tehche ye inçahn ye nde nda ro che coh ye. Ndete che coh inçahn ye ne, co ndaconan cahnevaco ye nduco adecoduhno ihyan che namin ritahno ye Dihvo vo Jesucristo.

⁴⁰ Ate che lado yáhn ne, rahcó che tahque ndahca cava ye ndete che metah ndaconan cah-nevaco ye. Tihca dirún, te co tihca nahn Vaco Ndah yahn Dendiohs.

8

Vedino che rihco ihyan nan dehtenduh che ndere redin ye dendiohs yahn ye

¹ Man ne, te cuandé nchuhn yahn vedino che rihco ihyan nan dehtenduh che ndere redin ye dendiohs yahn ye. Nducoyaco vo ne, devano tumacadino vo yahn dehtenduh. Chemin ne, co din che din yade vo, ate hua co din che ndahca cuahtenan vo nduco vih nan Dendiohs, te atenan che chenano cumo vo vedeyahino nduco vih che ndahca cuahtenan vo nan ye.

² Adecoduhno vo che ama devano vo, che rahco vo ne, rihnceh man vo uvo, te nde hua devano vo nduhca che redin yahn.

³ Ate ndete che yahino vo Dendiohs ne, nda cuande ye uvo.

⁴ Me yahn che chuh vo dehtenduh che rihco ihyan nan dehtenduh che ndere redin ye dendiohs yahn ye ne, hua cahnda. A devano vo te dehtenduh che ndere redin ihyan dendiohs yahn ye ne, metah vederihquentiyon yahn, anduhneca ndete che hua dehva. Va ama no Dendiohs.

⁵ Tihca, te andahre ama va dehtenduh che ndere redin ihyan dendiohs yahn ye man, dihve ye man, chenano nan ro man, ndiyahn man,

⁶ ate cava uvo che ritahno vo Dihvo vo Jesucristo ne, va ama no Dendiohs. A ihyan min che Chido vo. A man ye dendah ye nducuahn dehtenduh che

va. Dendah ye uvo cava ye. Namin va ama no Dihvo vo Jesucristo. Nduco ye Chida ye dendah ye uvo man, nducahn dehtenduh che va man.

⁷ Ate hua nducoyaca dihno vo retumacadino ye che metah vederihquentiyon yahn dehtenduh che ndere redin ihyan dendiohs yahn ye. Neve ye ne, nducote nevahncun ye dehtenduh chemin chan ro menan ne, chenun ca vedevah min ihyan. Chemin che nde meniyon ndete che adenan cheh ye dehtenduh che ndi vedino nan dehtenduh chemin chan ne, cuahtendihco ye nunde, che rahco ye, te metah tumacadino ye te vedino chemin chan hua dehva niyahn.

⁸ Ndete che chuh vo vedino chemin chan ne, ndiyu chemin din che tahque co chihvo vo nan Dendiohs, nde huane che hua chuh vo din che detohnan vo. Devano vo te ndiyu che reh vo redin che renan ino Dendiohs uvo.

⁹ Nchuhn che a devano ne che hua dehva niyahn vedino chemin chan ne, cuihco ne cudado cava dihno ne che metah conahn ndah ye yahn. Hua ndahca che cava ne, detohnan ye chedave yahn ye, cuahtedihco ye nunde.

¹⁰ Ndete che adenan ndihchero ye nchuhn che vate ne yaco nan che vate dehtenduh che ndere redin ihyan dendiohs yahn ye, reh ne ne, nduco ye cahquino ye cheh ye che ndi vedino nan dendiohs chemin chan,

¹¹ ne detohnan ye chedave yahn ye, cuahtendihco ye nunde. Nduco tihca ne, cava nchuhn che devano ne che hua cahnda che cheh ne ne, ndaca yune che tohnan chedave yahn dihno ne che metah conahn ndah ye. Cuenechahco ne te

namin çava ihyan min chih Dihvo vo Jesucristo, ndedevahn ye ihyan.

¹² Ndete che hua cahco nchuhn cudado ne, denan tihyon yune ne dihno ne çava che detohnan ye chedave yahn ye, ne man ne cuahtendihco ne nunde nan Dihvo vo Jesucristo.

¹³ Nducote tihca ne, nahn che din vo cudado. Ndete che va dehtenduh che rahco dihno vo che cahnda che cheh ye ne, tahque ndah che hua chuh vo dehtenduh chemin chan, çava che hua ndaca yune che detohnan ye chedave yahn ye, cuahtendihco ye nunde.

9

Vederihquentiyon che chenan cuma ihyan apóstol

¹ A chitahnó Dihvo vo Jesucristo, ndevahn. Quenan cumá vederihquentiyon, ndí apóstol yahn ye. Man ndihcheró Dihvo vo. A u tihyon yuné nchuhn che chitahno ne ihyan.

² Andahre vate ihyan che hua renevahnecun ye u nduhca apóstol, ate nchuhn che cuaco ne, a devano ne che ndí apóstol, te a u che cahndudó ndudo ndah yahn Dihvo vo Jesucristo, chitahno ne, ne nduco chemin ndero ndí che quenan cumá vederihquentiyon yahn ye.

³ Tuhca rendahconán yahn ihyan che rendahchenan ye ntiyon che redín.

⁴ Nuhn ne, chenan cuma nuhn vederihquentiyon, ndí nuhn apóstol, ne quenan cuma che te ihyan ndiyaco che chuhnun nuhn.

⁵ Namin co cahnevaco nuhn nduco ama cahvo vo, conduco ye nuhn nan che vatechica nuhn

nduhca che redin dihno Dihvo vo Jesucristo man, Pedro man, ihyan apóstol chenahn man.

⁶ U nduco Bernabé ne, namin chenán cuma nuhn vederihquentiyon min, nde hua redin fuerza che din nuhn tama nan ntiyon cava che ndaca che chuhnun nuhn.

⁷ A devano nchuhn te nducoyaca sandado ne, ndiyu nan ntiyon yahn man se riquenda che rechuhnun se. Namin ihyan che rihche ye dihyo uva ne, reh ye ndute yahn. Atihnocano tun ihyan che redin ye cudado chivato, te rih ye leche yahn te.

⁸⁻⁹ Hua rahco nchuhn che che nahn man che tihca dirun yahn ne, te yahn chemin ne, a tihyon yan Moisés ama vederihquentiyon, dirun ye tuhca: “Hua dechiche duto itenine che redende che trigo cava che tiviyato, te ri yahn te nahn cheh te.” Chihquentiyon Dendiohs che tihca, dirun Moisés, ndiyu deman yahn che redin ye cudado ite,

¹⁰ te nduco ejemplo min cah ye, checadino ihyan che nducoyaca ihyan che redin ye ntiyon yahn ye ne, a nan ntiyon min quenda che cheh ye. Tihca, te ihyan che ruhn yahn man, ihyan che rene din dave ye trigo man ne, redin ye ntiyon min, chenán ino ye che ndeva ye ndute ndata.

¹¹ Namin nuhn che redin nuhn ntiyon yahn Dendiohs, cahndudo nuhn ndudo ndah yahn Dihvo vo Jesucristo, chitahno ne ne, redin yahn che te ne che chuhnun nuhn.

¹² Ihyan chenahn ne, nducote recah nchuhn nduhca che redin yahn che rechuhnun ye ne, tahque ca nuhn, va che te ne, chuhnun nuhn.

Andahre quenan cuma che conan ne nuhn, te ne che chuñun nuhn, ate nde hua chica nuhn nchuñ. Tahque ndah ne, din chahtino nuhn, te hua nahn denduh nuhn nchuñ çava che hua co vañche yahn ne che cotahno ne ndudo ndah yahn Dihvo vo Jesucristo.

¹³ A devano nchuñ te ihyan che redin ye ntiyon chete yaço mañ, chidocuyan che chéñun ye nañ ta mañ ne, a nañ ntiyon min va che quendañ che chuñun ye.

¹⁴ Namin tihça chihco çade Dihvo vo Jesucristo che ihyan che rahndudo ye ndudo ndah yahn ye ne, a nañ ntiyon min quendañ che chuñun ye.

¹⁵ Andahre redin yahn che nañ ntiyon min quendañ che chuñún ne, ate nde hua retumacáñ yahn chemin, nde huane çava che conan nchuñ u che tihça dirún. Ndihcó che nde ro che cóñ ne, nde ama ihyan hua cahnevi ye vedeyeno yáñ che hua nañ ntiyon yahn Dihvo vo Jesucristo quendañ che chuñún.

¹⁶ Ndiyu yahn che nahn din yaδέ che rahndudó ndudo ndah yahn ye, te a chemin va che dín. Tihça, te ama vedín ndete che hua dináñ yahn ye.

¹⁷ Chemin che rahndudó numacuahn vedeyeno yahn máñ, ne nuhnde menun yáñ. Ate ndete che rahndudó andahre hua náñ ne, atañoça nduh rihco ró che ndihco Dendiohs ntiyon min táñ.

¹⁸ Vedeyeno yáñ ne, che cuahndudó ndudo ndah yahn Dihvo vo Jesucristo, dín tãma nañ ntiyon çava che ndaça che chuñún, te hua náñ che nañ ntiyon yahn ye quendañ che chuñún andahre tihça va çade.

¹⁹ Andahre hua va che cochicá nduhça che nahn

ama o ihyan, ate tihca redín cava che ndaca yune che tahque co yahn ihyan, cotahno ye Dihvo vo Jesucristo.

²⁰ Cuahn che renún van ihyan nación yahn Israel, ihyan chahn che renevahnecun ye ley che dirun Moisés ne, ri dama ndudó nduco ye, redinahn dama nduco ye ley min andahre ametah va che dinahn. Tihca redín cava che co yeno ye, ne cotahno ye Dihvo vo Jesucristo.

²¹ Namin no tun cuahn che renún van ihyan nación chenahn, che hua renevahnecun ye ley min, ndiyu che hua redinahn vederihquentiyon yahn Dendiohs man, Dihvo vo Jesucristo man, ate ri dama ndudó nduco ihyan chahn cava che co yeno ye, cotahno ye.

²² Cuahn che renún van dihno vo che hua renahn ndah ye vederihquentiyon yahn Dendiohs ne, redin chahtinó yahn ye cava che te yune ye che cah cuande ndah ihyan. Tihca redín nduco nducoyaca ihyan. Hua rendahchenán nde ama nan che redin ye cava che co yahn ye, cotahno ye Dihvo vo Jesucristo.

²³ Ama rihcó cudado nduhca che quechicá van nducoyaca ihyan, te nahn che co yahn ye, cotahno ye ndudo ndah yahn Dihvo vo Jesucristo, ndevahn dama nduco ye.

²⁴ A devano nchuhn nduhca che rano ihyan cade. Yahn ye rano ye nduco vih, ate ama no ye richa ye, ndonda tah ye premio yahn ye. Nduhca ihyan che tahque dito chano ye ne, tihca cuiquendi nchuhn numa ino ne, dinahn ne vederihquentiyon yahn Dihvo vo Jesucristo nde nda ro che ndahco menun Dendiohs yahn ne.

²⁵ Nducoyaca sahn che reduce se ne, redin se cudado sahn yahn nducuahn dehtenduh che co din che denda se, te nahn se che cocha se cava che ndonda tah se premio yahn se. Premio chemin chan ne, nun rihno. Ate uvo ne, che ndahco menun Dendiohs yuhn vo ne, hua cuihno.

²⁶ Nduhca sahn che rano se numa ino se man, nduhca sahn che reduce se numa ino se man ne, tihca redin.

²⁷ Nduhca che ama redin sahn chahn cudado sahn cava che hua denda se ne, tihca ama rihco cudado nan nducuahn che redin, te cuihno che ama riyahve ihyan chenahn che cahco ye cudado ne, hua nahn che denan denda man.

10

Yahve Pablo uvo che hua nevahneacun vo dehtenduh che ndere redin ihyan dendiohs yahn ye

¹ Dihno, nahn che cadino ne che nducoyaca ihyan ndico yuhn vo ne, chahtechica ye nduco vih man man che quendihco nan ro me. Namin chuh ye dama nduco vih mendahn reche Nuniyahn Cuah.

² Tihca chinduco nducoyaca ye Moisés, chahtechica ye nduco vih man man me, ne chuh ye nduco vih mendahn nuniyahn me, anduhneca ndete che dama chedenune ye nduco vih.

³ Dama cheh ye nduco vih che cah Dendiohs.

⁴ Namin adecotino che chahtechica ye nduco vih ne, chih ye nune che quendah nan yava me che cah Dendiohs ihyan. Yava min ne, anduhneca Dihvo vo Jesucristo.

⁵ Andahre ama din Dendiohs vederihno nduco ye ne, ate a nahn nducoyaca ye chahcotahn ye yahn ye, ne chemin che din Dendiohs castigo ihyan, chih ye yahn nan che metah duhva.

⁶ Nducuahn che chahno chi ihyan chahn ne, cochihve yuhn vo ndete che cua cuande vo yahn cava che hua cuahcotahn vo yahn vedeyahino yahn Dendiohs nduhca che din ye.

⁷ Hua quendi nchuhn yune yahn ihyan chahn, te ama yahn ye ne, nevahnecun ye dehtenduh ndere din ye dendiohs yahn ye. A devano vo che tihca din ye, te a ndirun nan Ndudo yahn Dendiohs tuhca: “Ndo dama ye nan chemin ca che ndere din ye dendiohs yahn ye, cheh ye man, chih ye man, chahte vihco ye man.”

⁸ Hua cuahtenan nchuhn nduco ihyan che hua nihnevaco nduco ne nduhca che din ama yahn ihyan chahn, ndere chahtechica ye. Din Dendiohs castigo ihyan chahn, chih tenduh ndico ino mil ye che ama ro no.

⁹ Hua cuahcotahn nchuhn yahn Dihvo vo Dendiohs, din ne che co doh ino ye nduco ne nduhca che din ama yahn ihyan chahn. Din Dendiohs castigo ihyan, ne cah cu ihyan, chih ye.

¹⁰ Hua cahma nunde nchuhn yahn Dendiohs nduhca che chahn nunde ihyan chahn. Din Dendiohs castigo ihyan, dechuh ye ama angel, cah ye cah ihyan, chih ye.

¹¹ Nducuahn dehtenduh che tihchan chahno chi ihyan ndico yuhn vo ne, chihquentiyon Dendiohs che quenan caca cava che, uvo che vato vo man ro cuh che a nun cuihno iyehnse ne, cua cuando vo, ne hua ndere din vo.

12 Nducote cahnda yuhn vo ne, duh nchuhn che hua dehva co yahn ne, che rahco ne ne, cuihco ne cudado che hua denan condihco ne nunde.

13 Nchuhn ne, retumarande chundah nchuhn nahñ cuan, rechuhrihn ne nduhca che rechuhrihn ihyan chenahn. Ate Dendiohs ne, redinahn ye ndudo yahn ye, ne hua cuahñecun ye che chuhñan chuhrihn ne. Tahque ndah ye ne, conan ye nchuhn ura che retumarande sahn min nchuhn cava che cocha ne.

14 Dihno che yahino nchuhn, nducote cahnda Dendiohs yuhn vo ne, cuihco ne cudado. Hua ndeva ne yavenan dehtenduh che ndere redin ihyan dendiohs yahn ye.

15 Nchuhn ne, ihyan renahn ne, ne a devano che conahn ne te cuaco ndudo che tihca dirun.

16 Cuahn che rendo damo vo nduco vih nduhca che chihco cade Dihvo vo Jesucristo ne, recah vo nundihve cuahn Dendiohs cava vino, rih vo. Nduco chemin ne, rihco ro vo che ama no vederendedecadino yuhn vo, ritahno vo Dihvo vo Jesucristo che chera yun yahn ye, quenah yah ye nan cruz cavo vo. Namin no tun, ura che rendeh vo pan, reh vo ne, rihco ro vo che ama no vederendedecadino yuhn vo, ritahno vo ihyan min che chihco mendahn ye ihyan, chih ye cavo vo.

17 Andahre yahn ri vo, ate nducote ama no pan reh vo nduco vih ne, ndero ndi che a nto vo nduco vih anduhñeca ama no ihyan.

18 Cuihco nchuhn cudado nduhca che ri van ihyan naci3n yahn Israel. Nduco che reh ye nduco vih dehtenduh che ndi vedino nan ta ne, rihnde ro che ama no vederendedecadino yahn ye.

¹⁹ Me dehtenduh che ndere redin ihyan dendiohs yahn ye ne, cuedevano nchuhn te metah nde ama vederihquentiyon yahn. Atihnoca dehtenduh che rihco ye nan, ri vedino ne, hua cahnda, te hua dehva ri yahn.

²⁰ Ate rahn ri nchuhn che hua nahn che dama co ne nduco ye, te che tihca redin ye ne, a vaco chihnga che rinduco ihyan, ndiyu Dendiohs.

²¹ Nchuhn che renevahnecun ne Dihvo vo Jesucristo, reh ne pan man, rih ne vino man, nduhca che chihco cade ye ne, hua ndahca che dama co ne nduco ihyan che rahte vihco ye, reh ye man, rih ye man, che rendeva ye yavenan vaco chihnga.

²² A devano nchuhn te Dihvo vo Jesucristo ne, ama cahnda ye, ne hua ndahca che cahn ne vedecahva ihyan. Ama vedin ne ndete che din ye castigo nchuhn.

Nduhca che nahn che cuahtenan cumo vo vedeyahino nduco vih

²³ Cuaco che nducuahn che nahn vo ne, co din vo. Ate hua nducuahn redin yahn che din vo. Hua nducuahn co conan dihno vo che tahque cochahtino ye Dihvo vo Jesucristo.

²⁴ Ndotenan che din vo dehtenduh che ri yeno man vo, tahque ndah ne, din vo dehtenduh che cochihve yahn ihyan chenhahn.

²⁵ Adecodehno che nahn cheh nchuhn ne, co cua ne ndihve. Nde hua ndedecadino ne yahn, nde hua tumerune ne ihyan yahn dehtenduh, a ndi vedino o hua,

²⁶ te iyehnse nduco nducuahn che va ne, a Dihvo vo Dendiohs chihco ye.

27 Namin ndete che ama ihyan che hua ritahno ye Dihvo vo Jesucristo yahve ye nchuhn che cahn ne, cheh ne nduco ye ne, co cahn ne ndete che nahn ne. Cocheh ne adecodehno che cheh ye nduco ne, ne cava che hua chihnga co ino ye ne, nde hua tumerune ne a ndi vedino dehtenduh chemin chan o hua.

28 Atenan che man ye quenda^h chende ye, cahma ye co ye nchuhn che dehtenduh che chihco ye nan ne ne, a ndi vedino yahn dehtenduh che ndere redin ye dendiohs yahn ye, tuhme che cuaco ne, cava che hua ndedecadino ye ne, hua cheh ne.

29 Hua cheh ne, ndiyu yahn che cahnda yahn ne che cheh ne, ate cava che hua ndedecadino ihyan min.

Ama o nchuhn ne, co rendedecadino ne che co cheh ne adecodehno che nahn ne, ne rahco ne che nde hua nahn che din ne cudado, andahre chihnga co ino ihyan chenahn.

30 Rahco ne che nde hua redin yahn che ndahchenan ye yahn dehtenduh che reh ne, te reneca^h ne nundihve cuahn Dendiohs cava chemin.

31 Hua ndahca^h ndete che tihca ndedecadino ne. Tahque ndah^h ne, cuihco nchuhn cudado nan nducuah^h dehtenduh che redin ne man, nan reh ne man, nan rih ne man, cava che ndaca^h yune che ndeva ihyan yavenan Dendiohs.

32 Hua cah yune ne che cava dehtenduh che redin ne conda nde ama ihyan, ihyan naci^on yahn Israel man, ihyan naci^on chenahn man, ihyan yahn Dendiohs che ritahno ye Dihvo vo Jesucristo man.

³³ Me u ne, a chihco inó che dín, ndiyu dehtenduh che ri yeno mán, ate dehtenduh che conan ino ihyan chenahn cava che ndaca yune che cotahno ye Dihvo vo Jesucristo, ndevahn ye.

11

¹ Nduhca che riquendí yune yahn Dihvo vo Jesucristo ne, tihca cuiquendi nchuhn yune yáhn.

Nduhca che va che nevahneacun ihyan ndahta chete yaco

² Dihno, ama yenó che cuahn dama renecahco nchuhn u, ne redinahn ne nducuahn che chicuáhn nchuhn.

³ Namin nahn te cuandé nchuhn tama te o ndudo che náhn che cadiño ne. Dendiohs Chida ne, ihyan min che rihquentiyon ye Dihvo vo Jesucristo. Jesucristo ne, ihyan min che rihquentiyon ye ihyan चाह्न. Ihyan चाह्न ne, ihyan चाह्न che rihquentiyon ye ihyan ndahta yahn ye.

⁴ Ihyan चाह्न ne, cahtera ye vedecuino yahn ye ndete che cuahco ye payon tin ye ura che covah ye o cuahndudo ye Ndudo yahn Dendiohs.

⁵ Me ihyan ndahta ne, cahtera ye vedecuino yahn ye ndete che hua cuahco ye payon tin ye ura che covah ye o cuahndudo ye Ndudo yahn Dendiohs, te ndete che tihca ne, anduhneca ndete che ndu rah ye tin ye.

⁶ Ndete che hua cuahco ye tin ye ne, tahque ndah che ndu rah ye. Atenan che cuihnan ye ndu rah ye ne, tuhme va che cuahco ye payon.

⁷ Ihyan चाह्न ne, hua redin yahn che cuahco ye tin ye, te dendah Dendiohs ihyan cava che co ro taqa man ye man, taqa vederihquentiyon yahn

ye mañ. Me ihyan ndahta ne, dendah Dendiohs ihyan cava che cahco ro ye vederihquentiyon yahn inchañ ye.

⁸ Tihca, te dinoca dendah Dendiohs ihyan chañ, ne adiva dendah ye ihyan ndahta.

⁹ A cava ihyan chañ che dendah ye ihyan ndahta. Ndiyu cava ihyan ndahta quenana cuma che dendah ye ihyan chañ.

¹⁰ Chemin che va che cuahco ihyan ndahta payon tin ye cava che cahco ro ye nan ihyan mañ, nan ángel mañ, che nevahnecun ye vederihquentiyon yahn inchañ ye.

¹¹ Andahre tihca ne, ate van uvo che ritahno vo Dihvo vo Jesucristo ne, nde ndahta, nde chañ, rigonun chihve.

¹² Andahre cava ihyan chañ che dendah Dendiohs ihyan ndahta, ate nde ro min ne, a ihyan ndahta che racoyahn ye ihyan chañ.

A Dendiohs che chihco cãde ye nducuahn

¹³ A devano mañ nchuhn te hua ndahca che hua cuahco ihyan ndahta payon tin ye ura che covah ye.

¹⁴ A namin no tun ama vedecuihno che cuahne-cun ihyan chañ che co rahno yudo tin ye.

¹⁵ Ate ihyan ndahta che cuaco ne, redin yahn che cuahtenan cuma ye yudo tin ye che rahno, te richihve cava che chendih tin ye.

¹⁶ Me ihyan che cãnda tin ye che hua conan ino ye che tihca te cuandé ne, codevano ye te nuhn mañ, ihyan yahn Dendiohs yahn nducuahn yaco mañ, hua chenana cuma nuhn costumbre che cuhma chende nuhn.

Ihyan ndiyaco ne, renevih Pablo nunde yahn ye vacoñan ye

¹⁷ Mañ ne, dirún yahn nchuhn yahn ama ñan che hua ndahca redin ne, ne yahn chemin ne, hua co ndevá yavenañ ne. Cane cuahn che rendo dama ne ne, ndotenan che cochihve yahn ne ne, deredinda ne,

¹⁸ te rañn ihyan ri ye u te cuahn che rendo dama ne yaco ne, ri ro che ndeh cuañ ndi ne. Tah ne, ritahnó, ne tah ne, hua ritahnó, ate rañcó te co cuaco ñahn ndudo che rañn ye.

¹⁹ Va che ndeh cuañ co ne, te min co ro cha nchuhn che ritahno ne numa cuaco Dihvo vo Jesucristo.

²⁰ Cuahn che rendo dama ne, rih ne vino mañ, reh ne pañ mañ, nduhca che chihquentiyon Dihvo vo Jesucristo ne, nducote ndeh cuañ ndi ne ne, ndero ndi che hua numacuahn chedave yahn ne,

²¹ te ndere vihco no che redin ne. Ñahn nchuhn ne, reh nduh ne dehtenduh che riquenda ne. Ñahn ne ne, hua rendaca reh ne. Ñahn ne ne, nde rícoh ne.

²² ¡A chuhnan cuahn che tihca redin nchuhn! ¿Ametah ndevaco ne, che cuahtenun ne, cheh ne mañ, cuh ne mañ? ¿Dehco che redin duche yahn ne ihyan yahn Dendiohs? ¿Taca rañco ne che rihtera ne vedecuihno yahn dihno vo che metah dehva yahn ye? Cua nchuhn tah vedecuihno. Che tihca redin ne ne, hua co ndevá yavenañ ne.

Nduhca che chihco cade Dihvo vo Jesucristo che cheh ihyan pañ mañ, cuh ye vino mañ

²³ Hua tihca chicuáhn nchuhn vederihquentiyon che ndahco Dihvo vo Jesucristo táh. Tuhca

vederihquentiyon min: Vino che va che necah ndeh se Dihvo vo Jesucristo, co ye preso ne, ura che cheh vino ye ne, chetah ye pan,

²⁴ necah ye nundihve cuahn Dendiohs. Tuhme ndeh ye, ne rahn ye: “Cocheh nchuhn. Chu ne, yute yahn. Va che nuhn yah ihyan u cava nchuhn. Tuhca codin ne, cuenecahco ne u.”

²⁵ Chihno cheh vino ye ne, namin chetah ye ama vaso vino, ne rahn ye: “Vino cuh ne, yun yahn che cora cava che conahn trato ra che ndahco cade Dendiohs. Queri ama yune che tihca cuh ne ne, cahco ro ne che renecahco ne u.”

²⁶ Rahn ri nchuhn te nduco tihca ne, cahco ro ne che renecahco ne Dihvo vo Jesucristo, te nde ro che ndaconan chi tun ye ne, queri ama yune che cheh ne pan man, cuh ne vino man, nduhca che chihco cade ye ne, cahco ro ne che renecahco ne nduhca che chih ye.

²⁷ Nducote cahnda vederihquentiyon min ne, adecoduhno ihyan che cheh ye pan man, cuh ye vino man, ate hua nduhca che chihco cade Dihvo vo Jesucristo ne, condihco ye nunde che din duche yahn ye che chih Dihvo vo man, che chera yun yahn ye man.

²⁸ Chemin che nahn che dinoca ndedecadino ihyan tachan ihyan ye, tuhme nduco vedino vedencun cheh ye pan man, cuh ye vino man, nduhca che chihco cade Dihvo vo.

²⁹ Tihca va che din ye cudado, te ihyan che ndere cheh ye, ndere cuh ye, che nde hua ndedecadino ye deh cuande ne, rihco yan man ye castigo che co ye yahn che duche rino ye Dihvo vo Jesucristo.

³⁰ A yahn nunde min che nahn dihno vo van

nchuhn ne, ndi ye cah cuno, ne nah̄n ye ne, ndi ye tāma te o nān cah, ne nah̄n ye ne, a chih ye.

³¹ Ate ndete che cāhco vo cūdādo yahn vederihquentiyon min ne, hua conan cuma Dihvo vo Dendiohs che din ye castigo uvo.

³² Ate che redin ye castigo uvo mān ro cuh ne, che nahn ye che nto ino vo nunde yuhn vo cāva che hua conda vo dāma nduco ihyan nunde.

³³ Dihnō, chemin che cuahn che ndo dāma nchuhn, cheh ne pān mān, cuh ne vino mān, nduhcā che chihco cāde Dihvo vo Jesucristo ne, cuahtenan rino ne vih.

³⁴ Ndete che cuico ne ne, tahque ndah che cuahte ne, cheh ne ndevāco ne che co che cāhn ne ndiyāco, ndere cheh ne, ne conan cuma Dendiohs che din ye castigo nchuhn. Me yahn dehtenduh chenah̄n ne, nte cāde vo nduco nchuhn cuahn che chí quendihcheró nchuhn.

12

Vederihquentiyon che recah Vaco Ndah yahn Dendiohs queri ama ihyan che ritahno ye Dihvo vo Jesucristo

¹ Dihnō, nahn che codevano nchuhn yahn ndeh nān vederihquentiyon che rete Vaco Ndah yahn Dendiohs, chenano cumo vo.

² A devano nchuhn te cuahn che metah cotahno ne Dihvo vo Jesucristo ne, ndeva ne yavenān dehtenduh che nde hua ri rāhn, che ndere redin ihyan dendiohs yahn ye.

³ Nducote nahn che codevano ndah nchuhn ne, chemin che rete cuandé nchuhn che adecoduhno ihyan che cāhva ye yahn Dihvo vo Jesucristo ne,

ndiyu Vaco Ndah yahn Dendiohs che rihquentiyon ihyan. A namin no tun, adecoduno ihyan che cahma ye che Jesucristo che Dihve ye ne, a Vaco Ndah yahn Dendiohs che rihquentiyon ihyan.

⁴ Van nducoyaco vo ne, ama ndeh nan vederihquentiyon che chenan cumo vo, ate a ama no Vaco Ndah yahn Dendiohs che rete.

⁵ Ama ndeh nan ntiyon che redin nducoyaco vo, ate a ama no Dihvo vo Jesucristo.

⁶ Ama ndeh nan ntiyon chenan cumo vo, ate ama no Dendiohs che redin ye che rinahn nducuah.

⁷ Queri ama vo ne, rete Dendiohs vederihquentiyon yahn Vaco Ndah yahn ye, chenan cumo vo cava che ndah yahn nducoyaco vo.

⁸ Nahn vo ne, redin Vaco Ndah yahn ye che rihnde tah vo vederihquentiyon che co cahmo vo numacuahn vededevano.

⁹ Nahn vo ne, che cotahno vo. Nahn vo ne, che din vo che ndoyahn ihyan cah.

¹⁰ Nahn vo ne, che din vo vederihno. Nahn vo ne, che cuahndudo vo ndudo che te Dendiohs. Nahn vo ne, che tumacadino vo cha ihyan che quenun Vaco Ndah yahn Dendiohs ihyan, ne cha ye che quenun vaco chihnga ihyan. Nahn vo ne, che cuahndudo vo tama te o nan devaco. Nahn vo ne, che co cah cuande vo deh conahn ndudo che cuahndudo ihyan devaco chemin chan.

¹¹ Andahre ama ndeh nan vederihquentiyon chemin chan, ate a ama no Vaco Ndah yahn Dendiohs che rete queri ama vo tunoca che nahn man.

*Nducoyaco vo che ritahno vo Dihvo vo Jesu-
cristo ne, ndi vo anduhneca ama no ihyan*

¹² Hua ndeh cuan ndi vo nduco vih, te andahre ama yahn ri vo, ate ndi vo anduhneca ama no ihyan, ndi cuande vo yahn Dihvo vo Jesucristo.

¹³ Tihca, te andahre ihyan naci3n yahn Israel, o ihyan tama naci3n uvo, andahre chenan cumo vo dihvo vo, o rihquentiyon man vo uvo ne, ate a ama no Vaco Ndah yahn Dendiohs nedin dama uvo, din che ndo vo anduhneca ama no ihyan, quenun queri ama vo.

¹⁴ Ihyan ne, chenan cah ye man, chenan tah ye man, chenan nducuahn dehtenduh yahn ye man.

¹⁵ Andahre che cahma cah ama ihyan: “U ne, hua tah ye u, ne chemin che hua ndi cuandé yahn ye”, ate ndiyu cava chemin che co din vih.

¹⁶ Andahre cahma revan ama ihyan: “U ne, hua ndutinan ye u, ne chemin che hua ndi cuandé yahn ye”, ate ndiyu cava chemin che co din vih.

¹⁷ Ndete che ndutinan no ihyan chenan ne, ametah deh nduco che cahnevan ye. Ndete che revan no ihyan chenan ne, ametah deh nduco che tahno ye.

¹⁸ Ate hua tihca, te Dendiohs ne, numa dendah ye ihyan nduhca che nahn man ye.

¹⁹ Ndete che deman cah ihyan ne, nde hua cochihve ye.

²⁰ Ate che cuaco ne, andahre ama ndeh nan dehtenduh yahn ihyan, ate ama no ye.

²¹ Hua redin yahn che cahma ndutinan ihyan co tah ye: “Hua rendotenán nchuhn.” Namin hua redin yahn che cahma tin ye co cah ye: “Hua rendotenán nchuhn.”

²² Hua redin yahn che tihca, te queri ama ne, rendotenan vih. Nde dehtenduh che rivahn che hua nduh richihve ne, chemin che nde tahque richihve.

²³ Dehtenduh che hua nduh rignonun chihve, che rahco vo ne, chemin che tahque ndah redin vo cudado. Namin dehtenduh che hua redin yahn che co ro ne, chemin ne, tahque nduco cudado chenan cumo vo

²⁴ che co dehtenduh chenahn. Tihca chihco cade Dendiohs che tahque din vo cudado dehtenduh yuhn vo che hua nduh rignonun chihve, che rahco vo,

²⁵ cava che, ndotenan che devavih co ne, ama cuan no co, conan vih.

²⁶ Ndete che rechuhrihn ama nan dehtenduh yuhn vo ne, rechuhrihn numachahto vo. Namin ndete che yan ama nan dehtenduh yuhn vo ne, yan numachahto vo.

²⁷ Namin van nducoyaco vo ne, chenan cumo vo ndeh nan vederihquentiyon, ndi vo anduhneca ama no ihyan, ndi cuando vo yahn Dihvo vo Jesucristo.

²⁸ Dendiohs ne, te ye vederihquentiyon yahn queri ama vo. Nahn vo ne, te ye vederihquentiyon che tahque chahte che co vo apostol. Nahn vo ne, che cuahndudo vo ndudo che te ye. Nahn vo ne, che cacuahn vo Ndudo yahn ye. Namin te ye tama te o nan vederihquentiyon nahn vo che hua nduh quenun yan. Nahn vo ne, che co din vo vederihno. Nahn vo ne, che co din vo che ndoyahn ihyan cah. Nahn vo ne, che conan vo chete yaco. Nahn vo ne, che cahcantiyon vo chete yaco. Nahn vo ne, che cuahndudo vo tama te o nan devaco.

²⁹ Hua nducoyāco vo va taḥ vo vederihquentiyon yahn apóstol. Hua nducoyāco vo va taḥ vo vederihquentiyon che cuahndudo vo ndudo che rete Dendiohs. Hua nducoyāco vo va taḥ vo vederihquentiyon che cacuahn vo ndudo yahn ye. Hua nducoyāco vo va taḥ vo vederihquentiyon che din vo vederihno.

³⁰ Hua nducoyāco vo va taḥ vo vederihquentiyon che co din vo che ndoyahn ihyan cah. Hua nducoyāco vo va taḥ vo vederihquentiyon che cuahndudo vo tama te o nan devāco. Hua nducoyāco vo va taḥ vo vederihquentiyon che cah cuande vo deh conahn devāco chemin chan.

³¹ Ndete che ama nahn cuahtenan cuma nchuhn ama vederihquentiyon chemin chan ne, codin nun ino ne che co cuhnde taḥ ne vederihquentiyon che tahque cochihve. Ate te cuandé nchuhn tama nan che nde tahque nahn che cuahtenan cumo vo.

13

Nahn che cuahtenan cumo vo vedeyahino

¹ Andahre co cuahndudo vo tama te o nan devāco, andahre devāco yahn ángel, ate ndete che hua chenān cumo vo vedeyahino ne, ndi vo anduhneca tambu man, cu dan che ndere rahco man.

² Namin andahre rahndudo vo ndudo che rete Dendiohs uvo, andahre ama chenān cumo vo vededevano che nde hua devano ihyan, andahre ama ritahno vo Dendiohs che nde cocha vederihquentiyon che chenān cumo vo che ndacorun ama icoyahn, cuhnde tama cuan, ate ndete che

hua chenān cumo vo vedeyahino ne, nde hua cochihvo vo.

³ Andahre cuihno ndihco vo nducuahn dehtenduh che va yuhn vo, conan vo ihyan chevah, andahre cahco mendahn vo uvo, cuihno cuco vo, ate ndete che hua chenān cumo vo vedeyahino ne, nde hua cochihve yuhn vo.

⁴ Ndete che chenān cumo vo vedeyahino ne, chahtino vo man, cuno ino vo man, hua din ve vo man, hua din yade vo man, hua din cun vo man,

⁵ hua ndere din vo man, hua din idihya vo man, hua ndere co tan vo man, hua cuahtenun ino vo vedecahva man,

⁶ hua co yeno vo yahn ihyan che rendihco ye nunde man. Tahque ndah ne, cuahtenan cumo vo vedeyahino. Tuhme co yeno vo yahn ndudo cuaco,

⁷ ne yahn nducuahn dehtenduh ne, nevahne-cun vo man, din chahtino vo man, cuahtenan ino vo man.

⁸ Nda ro che cuihno vederihquentiyon che cuahndudo vo ndudo che rete Dendiohs man, che cuahndudo vo tama te o nan devaco man, che cuahtenan cumo vo vededevano man, ate vedeyahino ne, hua cuihno.

⁹ Va che cuihno nducuahn vederihquentiyon chemin chan, te hua numa. Hua numa vededevano che chenān cumo vo man, hua numa rahn-dudo vo ndudo che rete Dendiohs man.

¹⁰ Ate cuahn che ndahco cade Dendiohs vederihquentiyon che numa ne, cuihno che hua numa.

¹¹ Cuahn che cahya uvo ne, rente vo man, rendedecadino vo man, renahn vo man, nduhca

cheçahya. Ate cuahn che chi ndico vo ne, chih-comañ vo nduhça che redin cheçahya.

¹² Tihça, te mañ ro cuh ne, anduhneça ndete che ama cheh ro dehtenduh mañ, hua ndah renahn vo mañ. Ate nda ro min ne, nduhça che rendihche ndah Dendiohs uvo ne, tihça conahn ndah vo yahn nducuahn dehtenduh.

¹³ Nducote tihça ne, va che quendi vo ino nan vederihquentiyon. Ama ne, che cotahno vo. Tama ne, che cuahtenan ino vo. Tama ne, che cuahtenan cumo vo vedeyahino. Me che cuahtenan cumo vo vedeyahino ne, chemin che tahque rignon chihve che co vederihquentiyon chenahn.

14

Vederihquentiyon che co cuahndudo vo tama te o nan devaco

¹ Codin nun ino nchuhn che cuahtenan cuma ne vedeyahino, namin che cuahtenan cuma ne vederihquentiyon yahn Vaco Ndah yahn Dendiohs, menan vihca che cuahndudo ne ndudo che rete ye.

² Chemin che tahque nahn, te cuahn che redin Vaco Ndah yahn Dendiohs che rahndudo ihyan tama te o nan devaco ne, atenan Dendiohs renahn ye.

³ Ate che rahndudo ye ndudo che rete Dendiohs ne, richihve yahn nducoyaco vo, redin che tahque numa ino vo ritahno vo Dihvo vo Jesucristo mañ, neçah yan chedave yuhn vo mañ.

⁴ Che rahndudo ihyan tama te o nan devaco che hua renahn vo ne, atenan cava mañ ye richihve. Ate che rahndudo ye ndudo che rete Dendiohs ne,

richihve cava nducoyaco vo che ritahno vo Dihvo vo Jesucristo.

⁵ Ama ndahca ndete che nducoyaca nchuhn cuahtenan cuma ne vederihquentiyon che cuahndudo ne tama te o nan devaco. Ate tahque ndahca ndete che cuahtenan cuma ne vederihquentiyon che cuahndudo ne ndudo che rete Dendiohs, te vederihquentiyon min ne, tahque rignonun chihve che co vederihquentiyon che rahndudo ihyan tama te o nan devaco, atenan ndete che vate ihyan che te cuande ye uvo deh conahn devaco chemin chan.

⁶ Dihno, nducote tihca ne, hua cochihve yahn nchuhn ndete che chi cuahndudo tama te o nan devaco che hua conahn ne. Atenan che cuahndudo ndudo che te Dendiohs, o cacuah nchuhn Ndudo yahn ye, tuhme cochihve yahn ne.

⁷ Anduhneca cu retive man, arpa man, che ihyan va che tive ye man, cuh ye man ne, ndete che a ndere cuah cuaco, o a ndere cuahco che hua nduco yuhno ne, nde hua cochihve.

⁸ A namin no tun van canda ne, ndete che a ndere cuah cuaco corneta ne, hua conahn sandado yuhno yahn, ne nde ama se hua cuahteyan se che cuhma se.

⁹ A chemin no cuahno co nchuhn ndete che cuahndudo ne deman devaco che hua conahn ne. A ndere cuahndudo ne devan yuhne.

¹⁰ Cuaco te ama ndeh nan devaco va iyehense, ne ihyan che rente ye devaco chemin chan ne, renahn ye yahn vih.

¹¹ Ndete che cahmo vo devaco yuhn vo nduco ihyan tama nacion ne, hua conahn ye. Namin

ndete che cahma ye devaco yahn ye nduco vo ne, hua conahn vo.

¹² Tihca hua cochihve yuhn vo che cahmo vo ndudo che hua conahn vo. Ama ndahca che ama nahn cuahtenan cuma nchuhn vederihquentiyon yahn Vaco Ndah yahn Dendiohs, ate codin nun ino ne che cuahtenan cuma ne vederihquentiyon che din che nducoyaca nchuhn, ihyan ndiyaco ne, tahque numa ino ne cotahno ne Dihvo vo Jesucristo.

¹³ Dihno vo che cuahndudo ye tama nan devaco che hua conahn nchuhn ne, nahn che caça ye Dendiohs che conahn ye, ne co te cuande ye nchuhn yahn ndudo che cuahndudo ye.

¹⁴ Tihca, te ndete che covah vo nduco tama nan devaco che hua renahn vo ne, anduhneca ndete che vaco vo che revah, ate man vo hua renahn vo.

¹⁵ Nducote tihca ne, nahn che covah vo nduco devaco che hua renahn vo, ate namin nahn che covah vo nduco devaco che renahn vo. Nahn che cato vo nduco devaco che hua renahn vo, ate namin nahn che cato vo nduco devaco che renahn vo.

¹⁶ Ndete che necah vo nundihve cuahn Dendiohs nduco tama nan devaco che hua renahn ihyan che nduco ye uvo ne, hua necah ihyan chahn nundihve cuahn Dendiohs dama nduco vo, te hua devano ye deh che revah vo.

¹⁷ Cuaco te numa ino vo co necah vo nundihve cuahn Dendiohs nduco tama nan devaco. Ate nducote hua conahn dihno vo che nduco ye uvo ne, hua co din che tahque numa ino ye quendi ye cotahno ye Dihvo vo Jesucristo.

¹⁸ Nchuhn ne, chenan cuma ne vederihquen-

tiyon che rahndudo ne t̄ama te o n̄an dev̄aco. Namin u ne, quenan cumá vederihquentiyon min, ne reneçáh nundihve cuahn Dendiohs che tahque yudo vederihquentiyon min yáhn che co yahn nducoȳaca nchuhn.

¹⁹ Ate cuahn che quenún chete yaco van dihno vo ne, tahque náhn che cuahndudó mare uhn ndudo che co conahn ye che co che cuahndudó ndiche mil ndudo ama dev̄aco che hua conahn ye.

²⁰ Dihno, hua co nchuhn nduhçá cheçahya n̄an vederendedecadino yahn ne. Co ne nduhçá cheçahya n̄an dehtenduh che chihnga, hua cuah-tendihco ne nunde. Ate n̄an vederendedecadino yahn ne ne, co ne nduhçá ihyan ndico.

²¹ N̄an Ndudo yahn Dihvo vo Dendiohs ne, ndirun tuhçá: “Dechúh ihyan t̄ama nación, cuahndudo ye ndudo yáhn nduco dev̄aco yahn man ye, cahnevan ihyan nación cuh. Ate nde nduco nduh ne, hua nevahneçun ye u.”

²² Nducote tihçá ne, devano vo te vederihquentiyon che cuahndudo ihyan t̄ama n̄an dev̄aco ne, a çava ihyan che hua ritahno ye che chihco çade Dendiohs, ndiyu çava ihyan che ritahno ye. Ate vederihquentiyon che rahndudo ihyan ndudo che rete Dendiohs ne, a çava ihyan che ritahno ye che chihco çade ye, ndiyu çava ihyan che hua ritahno ye.

²³ Chemin che ndete che ihyan che hua ritahno ye Dihvo vo Jesucristo nda ye chete yaco, ne ura min vari ne rahndudo nducoȳaca ne damandahn t̄ama te o n̄an dev̄aco ne, ndedecadino ye che luco ne.

²⁴ Ate ndete che ura che nda ye rahndudo ne

ndudo che rete Dendiohs ne, conahn ye, ne ndo ino ye,

²⁵ tumacadino ye che quendihco ye nunde nan Dendiohs. Tuhme numacuahn vedeneacun nto ino ye nunde yahn ye, ndeva ye yavenan Dendiohs. Cuacotuhn ye ndudo che cuaco niyon che quenun Dendiohs van nchuhn.

²⁶ Dihno, tuhme ne, cuahn che ndo dama nchuhn yaco ne, codinahn ne adecochano vederihquentiyon che nte Dendiohs nchuhn, a che cata ne salmo, a che cacuahn ne Ndudo yahn ye, a che cuahndudo ne ndudo che rete ye, a che cuahndudo ne tama te o nan devaco, a che cah cuande ne deh conahn devaco chemin chan. Ate codin ne cuande che nan nducuahn dehtenduh che din ne ne, cochihve yahn nducoyaca ne cava che tahque numa ino ne quendi ne cotahno ne Dihvo vo Jesucristo.

²⁷ Cuahn che cuahndudo nchuhn tama te o nan devaco ne, hua damandahn cuahndudo nducoyaca ne, te ca ama ca ama ne cuahndudo ne. Avane ne, queri ama yune che ndo dama ne ne, co cuahndudo ama o ne, atenan cuahn ne, ino ne. Ate va che cah cuande ama cha nchuhn deh conahn devaco chemin chan.

²⁸ Ate ndete che ametah duh che te cuande ne, tahque ndah che cahma queri ama nchuhn chete chedave yahn ne, cahnevan Dendiohs, che co che cuahndudo ne van ihyan.

²⁹ Namin ihyan che chenan cuma ye vederihquentiyon che rahndudo ye ndudo che rete Dendiohs ne, queri ama yune che ndo dama ye ne, atenan o ino ye co cuahndudo ye, ne combiero yahn ye ne, va che cahcovan ye, din ye cudado

vederihquentiyon min.

³⁰ Ndete che denan cah Dendiohs ndudo che cuahndudo tama ye ne, ihyan che a quendihco mendahn rahndudo ye ne, nguan ye cuahndudo ye, cuahnecun ye che cuahndudo combiero yahn ye.

³¹ Hua redin yahn che damandahn cuahndudo nchuhn, te co cuahtenan rino vih ne, cuahndudo ca ama ca ama ne cava che co conahn nducoyaca ihyan ndiyaco, ne cuahtenun ino ye.

³² Co cuahtenan rino vih ne, te andahre vederihquentiyon che chenana cuma ne redin che rahndudo ne, ate co cahcantiyon man ne, ne cuahndudo ne ura che redin yahn.

³³ Tihca, te Dendiohs ne, runecade ye, ne runecade nducuahn vederihquentiyon yahn ye.

Nduhca che va cade nduh cuan yaco nan che rendo dama ihyan yahn Dendiohs ne,

³⁴ hua redin yahn che cuahndudo ihyan ndahta. Tahque ndah ye ne, nevahnecun ye nduhca che rihquentiyon ley che dirun Moisés.

³⁵ Ndete che va deh che tumerune ye ne, ndevaco ye tumerune ye inchahn ye, te hua redin yahn che tumerune ye chete yaco.

³⁶ Cuedevano nchuhn, te Ndudo yahn Dendiohs ne, ndiyu nduco nchuhn canan, nde ndiyu deman cava nchuhn che va.

³⁷ Adecochano nchuhn che rahco ne che que nan cuma ne vederihquentiyon che rahndudo ne ndudo che rete Dendiohs, o tama nan vederihquentiyon yahn Vaco Ndah yahn ye ne, ndete che cuaco ne, conahn ne che a Dihvo vo Jesucristo chihquentiyon ye che tihca dirun.

³⁸ Ate adecoduhno ihyan che hua nevahncun ye ne, hua nevahncun nchuhn ihyan.

³⁹ Dihnó, man ne, codin nun ino nchuhn che cuahtenan cuma ne vederihquentiyon che cuahndudo ne ndudo che rete Dendiohs. Namin hua cahca tan ne yahn vederihquentiyon che chenán cuma dihno vo che rahndudo ye tama te o nan devaco.

⁴⁰ Nahn che runecade ne nan nducuahn che redin ne. Ca ama ca ama ne cuahndudo ne.

15

Dihvo vo Jesucristo ne, ntuche ye van tenahn

¹ Dihnó, namin nahn che ndecadino nchuhn yahn ndudo ndah yahn Dihvo vo Jesucristo che cahndudó, chihnevan ne. Nevahncun ne ndudo min, ne nde meniyon riquendi ne ritahno ne ihyan.

² Ndete che numa cuaco chitahno ne nduhca che cahndudó man, quendi ne dinahn ne man ne, din ndudo min che ndevahn ne.

³ Dendiohs ne, te ye checadinó vederihquentiyon yahn ye che tahque menan vihca, ne cahndudó, chihnevan nchuhn. Vederihquentiyon min ne, che chih Dihvo vo Jesucristo cava nunde yuhn vo nduhca che a ndirun nan Ndudo yahn Dendiohs.

⁴ Chihno ino ro che cheche ye ne, ntuche ye nduhca che a ndirun nan Ndudo yahn Dendiohs.

⁵ Cuahn che a ntuche ye ne, chihnde ro ye nan Pedro. Chihno min ne, chihnde ro ye nan nduh che ndichiamá apóstol yahn ye.

⁶ Adivē ne, nchuh ca uhn ciento dihno vo che ndi dama ye ne, ndihchero ye ihyan. Nahn ihyan chahn ne, a chih ye, ne nahn ye ne, vate ca ye nde meniyon.

⁷ Tah cuahn adivē ne, ndihchero Jacobo ihyan. Chihno min ne, ndihchero nducoyaca ihyan apóstol ihyan.

⁸ Nde nan che chihnonan yahn ne, chihnde ro ye nan. U che nde hua redin yahn che din yahn ye u ne, namin ndihchero ihyan.

⁹ Van nducoyaca ihyan apóstol ne, u che tahque hua rignonun chihvé. Nde hua redin yahn che có apóstol, te din tán nduco ihyan yahn Dendiohs che ritahno ye Dihvo vo Jesucristo.

¹⁰ Ate din yahino Dendiohs u, ne ndedevahn ye u, te ye vederihquentiyon quenán cumá. Ama chichihve che din yahino ye u, te u che tahque dín ntiyon yahn ye che co nducoyaca ihyan apóstol chenahn. Ate ndiyu nduco vededevano yahn man che din ntiyon yahn ye, te numacuahn vedeyahino chinan man ye u.

¹¹ Nducote a ntuche Dihvo vo Jesucristo van tenahn ne, u man, ihyan apóstol chenahn man, a ndudo min che rahndudo nducoyaca nuhn. Me nchuhn ne, a chihnevan ne ndudo min, chitahno ne.

Tenahn ne, va che ntuche ye

¹² Nducote a ntuche Dihvo vo Jesucristo, chaco-tuhn nuhn ndudo yahn ne, hua ndahca redin ama o ihyan van nchuhn che vatechica ye rahndudo ye che tenahn ne, hua ntuche ye.

¹³ Ndere rahn ye chemin, te Dihvo vo Jesucristo ne, cuaco niyon che ntuche ye.

¹⁴ Andahre tihca rahn ihyan chahn, ate richihve ndudo che rahndudo nuhn, namin cochihve yahn nchuhn che chitahno ne, te Dihvo vo Jesucristo ne, a ntuche ye.

¹⁵ Numa cuaco rahndudo nuhn Ndudo yahn Dendiohs che ndedetuhche ye Dihvo vo Jesucristo. Me ihyan chahn che rahn ye che hua ntuche tenahn ne, nahn conahn che nde Dihvo vo Jesucristo ne, hua ntuche ye.

¹⁶ Ate Dihvo vo Jesucristo ne, cuaco niyon che ntuche ye. Namin quenan cuma che ntuche tenahn.

¹⁷ Che rahn ihyan chahn che metah vederihquentiyon che ntuche tenahn ne, nahn conahn che hua ntuche Dihvo vo Jesucristo man, hua chichihve yahn ne che chitahno ne ihyan man, nde hua ndaca ne vederenchahco cava nunde yahn ne man.

¹⁸ Che lado yahn ihyan chahn ne, tenahn che chitahno ye Dihvo vo Jesucristo ne, ama yune no chihnonan yahn ye.

¹⁹ Van nducoyaca ihyan ne, uvo che tahque ndah ro yuhn vo, te ritahno vo Dihvo vo Jesucristo, ne quenan cuma che ntuche vo.

²⁰ Menan vihca ne, ndedetuhche Dendiohs Dihvo vo Jesucristo. Namin quenan cuma che ndedetuhche ye nducoyaca tenahn che chitahno ye ihyan,

²¹ te nduhca che cava ama ihyan chihnde vederih ne, tihca cava tama ihyan ne, chihnde cade che ntuche tenahn.

²² Tihc̄a, te che chih Adán ne, quenán cuma che coh nducoyaca ihyan. Namin che ntuche Dihvo vo Jesucristo ne, quenán cuma che ntuche nducoyaca ihyan yahn ye.

²³ Ihyan ne, a va cade ro che ntuche ye. Menán vihca ntuche Dihvo vo Jesucristo, ne cuahn che ndaconan chi tun ye ne, tuhme ntuche nducoyaca ihyan yahn ye.

²⁴ Chihno min ne, va che nto iyehnse, decuihno Dihvo vo Jesucristo nducuahn vederihquentiyon che rahcotahn yahn ye, ne ndahco ye vederihquentiyon yahn ye tah Dendiohs Chida.

²⁵ Tihc̄a, te Dihvo vo Jesucristo ne, va che quendi ye cahcantiyon ye nde conan ndahco ndiya Dendiohs nducoyaca ihyan che hua ri rendihche ye ihyan cava che nevahnecon ihyan chahn ihyan.

²⁶ Nde nan che cuihnonan yahn ne, decuihno Dihvo vo Jesucristo vederih.

²⁷ Tihc̄a va che co, te a ndirun nan Ndudo yahn Dendiohs che ndahco Dendiohs nducuahn vederihquentiyon tah ye. Che tihc̄a ndirun che ndahco Dendiohs vederihquentiyon tah Dihvo vo Jesucristo ne, nahn conahn che man ye ndinan ye, hua chuhnan Dihvo vo ihyan.

²⁸ Dihvo vo Jesucristo, ihyan min che Daya Dendiohs ne, nuhnde tah ye nducuahn vederihquentiyon, ne nevahnecon ye Chida ye Dendiohs. Cahco ro man ye che ihyan min che ndahco ye vederihquentiyon tah ye man, ihyan min che ndinan ye man.

²⁹ Me ihyan che redenune ye cava tenahn yahn ye ne, ¿a ndiyu che chenan ino ye che ntuche ihyan chahn che tihc̄a redin ye? Ndete che hua quenán

cuma che ntuche tenahn ne, co nde hua tihca din ye.

³⁰ Ndete che hua va che ntuche tenahn ne, nde hua redin yahn che cahco mendahn nuhn nuhn, din tan ihyan nduco nuhn.

³¹ Dihno, nduhca che cuaco che ama yeno che chitahno nchuhn Dihvo vo Jesucristo ne, tihca ndudo cuaco che ndihco mendahn u, redin tan ihyan nduco.

³² Muhn yan Efeso ne, anduhneca ndete che van ite tan quenun. Ndete che hua cuaco che va che ntuche tenahn ne, nde hua cahquinó cahco mendahn u tihca. Tahque ndah ne, cochica vedeyeno yahn man, chéh man, cúh man, te caviyan deman ne, va che coh.

³³ Hua cahnceh man ne nchuhn, ndedecadino ne che hua dehva co yahn ne che dama co ne nduco ihyan nunde, te co nino ne, ne quendi ne yune yahn ye.

³⁴ Condedecadino nchuhn, ne runecade cuahtenan ne, hua cuahtendihco ne nunde. Redin yahn che tihca yahvé nchuhn, te nde van nchuhn ne, vate ca ihyan che hua renahn ye vederihquentiyon yahn Dendiohs, ne chemin ne, ama vedecuihno cava ne.

Nduhca che va che ntuche tenahn

³⁵ Co vate ama o nchuhn che tumerune ne, ¿taca ntuche tenahn? ¿Taca ndo numa ye ne?

³⁶ Ama tundo ihyan che tihca tumerune ye. A devano ye te cuahn che rihcho vo ama ndute ndata ne, riquendah yan, ne rihta, ate man ndute ndata ne, rechca.

³⁷ Che rihcho vo trigo, o tama nan ndute ndata ne, cuahn che riquendaḥ ne, ametah dama nduco ndute ndata che chihcho vo.

³⁸ Redin Dendiohs che rihta tunoca ndata yahn nduhca che a ndihco cade ye.

³⁹ Nducuahḥ che dendah Dendiohs ne, hua dama nduco vih. Vate ihyan man, vate ite che cun cah te man, vate yahda man, vate yahca man, ne queri ama ne, a vih vih chan.

⁴⁰ Namin che chenan nan ro nduco che va ndiyahn ne, hua dama nduco vih. Ndahchan nduh che o nan, ate queri ama ne, a vih vih chan.

⁴¹ Dave yahn yahn man, dave yahn iyo man, dave yahn iyon man ne, hua dama. Nde iyon ne, hua dama dave yahn nduco vih.

⁴² Atihnoca vederihquentiyon che ntuche tenahn, te cuahn che ntuche ye ne, a ntacorun ye, ametah dama ye nduhchan ye cuahn che chahtenan ye ihyense. Che rehche ihyan ne, ndih ye, ate che ntuche ye ne, ametah ndaconan coh ye.

⁴³ Che rehche ye ne, ndih ye, ate che ntuche ye ne, ama ndahchan ye. Che rehche ye ne, ndih ye, ate che ntuche ye ne, detino ye.

⁴⁴ Che rehche ye ne, ihyan iyehḥse ye, ate che ntuche ye ne, ndacorun ye, co ye ihyan yahn vahchetero, cuahtenan cuma ye vederihquentiyon yahn Vaco Ndah yahn Dendiohs. Vate ihyan iyehḥse; namin vate ihyan yahn vahchetero.

⁴⁵ Tihca, nduhca che a ndirun nan Ndudo yahn Dendiohs tuhca: “Van ihyan iyehḥse ne, menan vihca dendah Dendiohs Adan.” Adiva yahn ihyan min ne, nda tama ihyan ndinan che a nahn dama

nduhçá ihyan min, chica ye vahchetero, chihco ye vederihquentiyon che va che ntuche ihyan yahn ye.

⁴⁶ Mañ ro cuh ne, ihyan iyehñse uvo, ate caviyañ deman ne, ndaçondá vo ihyan yahn vahchetero.

⁴⁷ Adán me ne, ihyan iyehñse ye, dendah Dendiohs ihyan nduco yuniyañh. Adiva yahn ihyan min ne, ndá Dihvo vo Jesucristo, ihyan min che chica ye vahchetero.

⁴⁸⁻⁴⁹ Nduhçá che ðama vo nduco ihyan che dendah Dendiohs nduco yuniyañh me ne, tihçá ðama co vo nduco ihyan che chica ye vahchetero me.

⁵⁰ Dihnó, ráñh rí nchuhn te numanahn che metah ndacorun ihyan iyehñse ne, hua co cuahtenan ye vahchetero ñañ che rihquentiyon Dendiohs. Hua co ye min nduhchan ye mañ ro cuh. Ihyan che va che coh ye ne, hua co cuahtenan ye min ñañ che ametah ndaconan coh ihyan.

⁵¹ Namin nte cuandé nchuhn ama ndudo che cade te Dendiohs checadino vo. Hua nducoyaço vo va che coh vo, ate nducoyaço vo ne, va che ndacorun vo

⁵² venchahteno nduhçá che riya cuah. Tihçá va che co ro min cuahn che cuah corneta ñañ cuhnonan yahn. Ura che cuah corneta me ne, ntuche tenañh, metah ndaconan coh ye, ne ihyan che vate ca ye ro min ne, ndacorun ye.

⁵³ Va che ndacorun ye, te ihyan ne, hua rengu ye, ne quenán cuma che ndaçondá ye ihyan che ngu ye cuahn ðama. Namin ihyan ne, rih ye, ne quenán cuma che ndaçondá ye ihyan che metah ndaconan coh ye.

⁵⁴ Cuahn che a ndo vo ihyan che rengu ye,

che metah ndaconan coh ye ne, tuhme conahn nduhca che a ndirun nan Ndudo yahn Dendiohs tuhca: “Vederih ne, cuihno. Ametah ndaconan coh ihyan.”

⁵⁵ Vederihquentiyon min ne, cuihno. Ametah deh cuande che vah vo. Ametah dehva co yuhn vo.

⁵⁶ Che numacuahn vedeyah rih ihyan ne, chihnde cava nunde yahn ye. A ley yahn Dendiohs che dito yahn vederihquentiyon min.

⁵⁷ Nundihve cuahn Dendiohs che dechuh ye Dihvo vo Jesucristo, ndedevahn ye uvo tah vederih.

⁵⁸ Dihno che yahino nchuhn ne, nducote va che ntuche vo ne, chemin che cuiquendi ne numa ino ne codin ne ntiyon yahn Dihvo vo Jesucristo. A devano ne te ntiyon che redin ne yahn ye ne, cochihve.

16

Vedino che chi dama cava ihyan yahn Dendiohs che vate ye yan Jerusalén

¹ Me yahn vedino che co dama cava ihyan yahn Dendiohs ne, codin dama nchuhn anduhca che chihquentiyon nduh can yaco, yahn yahn Galicia.

² Ndate ndate domingo ne, cuihco vih queri ama nchuhn tume nduhva che tuno tah ne, cava che hua nde ro che nda, nedin dama ne vedino min.

³ Cuahn che nda ne, ihyan che tendahnun nchuhn ne, dechuh ihyan yan Jerusalén. Dirun caa, quenda ye nduco vedino yahn ne, necah ye dihno vo che vate ye min.

⁴ Ndete che va che cahn mán ne, cahn nuhn dama nduco vih.

Nte cade Pablo ti nduh nan che va che cahn ye

⁵ Dinoca cahn quendihcheró dihno vo che vate ye yahn yahn Macedonia, tuhme chí quendihcheró nchuhn.

⁶ Ndete che co ne, conán nduco nchuhn ama o iyo, o ndete che co ne, conán numacuahn ró iche. Tuhme co conan nchuhn u adecotino che va che cahn.

⁷ Tihca, te hua náhn che atenan ama o ro no conán nduco nchuhn. Ndete che te yune Dendiohs ne, náhn che rahn conán nduco ne.

⁸ Ate conan cá muhn yan Efeso nde nda vihco yahn Pentecostés,

⁹ te ama va ntiyon yahn Dihvo vo Jesucristo che redín mán, ama yahn ihyan che rahcotahn ye mán.

¹⁰ Cuahn che nda Timoteo ne, cuenevahne-cun nchuhn sahn cava che conan se numacuahn vedeyeno, te sahn min ne, redin se ntiyon yahn Dihvo vo Jesucristo nduhca u.

¹¹ Hua ducherino ne, ndihchero ne sahn. Tahque ndah ne, conan ne sahn cava che va mán ino se ndaca che chuhnun se che conun yune se, te quenán rinó sahn nduco dihno vo chenahn.

¹² Me dihno vo Apolos ne, ama chica favor sahn che chi se nduco dihno vo chenahn, quendihchero se nchuhn, ate hua cahne-cun se. Atenan cuahn che conun yahn se, chi se.

Renecah Pablo Dendiohs dihno vo che vate ye yan Corinto

13 Cuiquendi nchuhn numa ino ne cotahno ne Dihvo vo Jesucristo mañ, cuahteyan ne mañ, cuan dito ne mañ.

14 Nducuahñ che din ne ne, codin ne numacuahn vedeyahino.

15 Dihno, a devano nchuhn te van ihyan che vate ye yahñ yahn Acaya ne, Estéfanos nduco ihyan ndevaco ye menan ndita chitahno ye ndudo ndah yahn Dihvo vo Jesucristo. Namin a devano ne te redinahñ ihyan chahn vederihquentiyon che rinan ye ihyan yahn Dendiohs.

16 Cuiquendi nchuhn yune yahn ihyan chahn, codinahñ ne nduhca che redinahñ nducoyaca ihyan che redin ye ntiyon yahn Dihvo vo Jesucristo mañ, rinan ye ihyan yahn ye mañ.

17 Ama yenó che nda Estéfanos mañ, Fortunato mañ, Acaico mañ, te anduhneca ndete che nchuhn nda ne.

18 Necah yan ye chedave yahñ mañ, nchuhn mañ. Nahn che ntumanecun ne nducoyaca ihyan che nduhca ihyan chahn.

19 Numacuahn vedeyahino yahn Dihvo vo Jesucristo cuendeva nchuhn Dendiohs yahn nducoyaca dihno vo che vate ye yahñ yahn Asia, Aquila mañ, Priscila mañ, nduco nducoyaca dihno vo che rendo dama ye vaco ye.

20 Cuendeva ne Dendiohs yahn nducoyaca dihno vo che vate ye muhn. Numacuahn vedino vedeneñ cueneñ ne Dendiohs vih.

21 U Pablo, dirun man ama o ndudo yahn ne, renté Dendiohs nchuhn.

22 Cochi Dihvo vo Jesucristo. Adecoduhno ihyan che hua din yahino ye ihyan min ne, conda ye, co

ye castigo yahn Dendiohs.

²³ Ihyan min ne, din yahino ye nchuhn.

²⁴ Me u ne, ama yahinó nducoyaca nchuhn che ritahno ne ihyan. Tihca co.

El Nuevo Testamento: Cuicateco de Teutila New Testament in Cuicatec, Teutila (MX:cut:Cuicatec, Teutila)

copyright © 1972 Wycliffe Bible Translators, Inc.

Language: Cuicatec, Teutila

Translation by: Wycliffe Bible Translators, Inc.

Cuicateco, Teutila [cut], Mexico

Copyright Information

© 1972, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Teutila

© 1972, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 28 Dec 2024 from source files
dated 29 Jan 2022

6bd8292c-2070-5c2d-8b8b-378bf0f66afe